



10413

寄思齋藏稿卷三

萬載辛從益筠谷著

男桂雲謹輯

序

周春谿夢游圖詩序

湯節庵雙燈詩序

山左試牘存真編序

江蘊試牘存真編序

辛氏名人輯略序

南嶺湯氏族譜序

九谿蔣氏族譜序

施半岩新輯族譜序

辛氏義學兼義田冊序

送兩亭周邑侯序

跋

寄思齋藏稿卷三目錄

岳忠武王真蹟跋

晦木山房詩集跋

喬筆珊文稿跋

徐秋潭三沙紀事跋

秋潭詩草跋

後街晏氏譜跋

馮鷓海某錄跋

郭竹園安雅居題跋

施繁安行實書後

記

萬載試院記

重修龍河書院記

尙志書院記

惜字局樂助碑記

附引

胥氏宗祠祭屏記

宜春惜字亭記

重修萬歲橋記

周春谿夢游圖詩序

天下非夢境也使彝倫儔類一切皆視如夢幻此釋老
虛無之指儒者弗向然至生死升沈儻忽遷化欲不視
爲夢境而不可得吾觀春谿夢游圖有感焉春谿家世
孝友科第爲洪州望族偕其兄筱山竝有雋才而折節
好學嘗從余問字力自磨厲冀以文學紹其家聲筱山
先十年舉於鄉其爲文深秀雅靜春谿喜爲沈博絕麗
制藝外兼工駢體雖純熟稍遜乃兄絢爛過之所居周
坊距省城數十里距余縣約四百里余每至省垣筱山
寄思齋藏稿

卷三序

二

兄弟必來尋余寓相見別後書問無間時而春谿方爲
諸生以試事抵省會出詩文商榷尤多每見必深談竟
日乃去辛未春間余方謀北上春谿連日來晤余於蓼
洲依依不忍別其關切悃懇出於至性師友之間以義
合且如此其家庭孝友惇篤可知嗚呼此豈委心任運
視世界如夢幻者比哉春谿初名行儉去年閱試錄無
其名深用悵然比春谿書至知其易名獲雋則大喜以
爲文章有憑且必其聯捷今果與筱山同登春榜此豈
非高才至性享文字福之明驗耶顧筱山旣成進士官

中翰而春谿猝嬰腫疾不克與 廷試至沈篤以死嗚呼豈所謂夢游者眞夢人世富貴功名如圖中樓閣諸景俱在雲濤縹渺間可望而不可卽耶夫以春谿之文之行之美其當理真切旣不可謂之幻卽其上公車捷春官偕多士旅進覆試 殿廷皆顯顯然親歷其境而不可謂之夢或曰荷風竹露雲水蒼茫境高寒非人所居妖夢固弗祥焉然而方壺員嶠蓬萊宮闕近在目前登瀛之兆是又吉夢而非噩夢且以才如春谿而咫尺玉堂竟如海上神山不知世所稱文章鉅公宜居此座者竟何等也嗚呼此豈非命耶抑韓子云人之生世如夢一覺莊生云有大覺而後知此其大夢吾安知自謂非夢者之不俱在夢中也人生惟藝倫分誼盡其當然而外此皆可付之一夢春谿力學成名獲慰親志斯游良不虛至於苑枯之集命所難強比之曰夢亦宜然則春谿固可無憾也輒附四絕旣以題其圖且以慰彼山

鶴鴿之痛

詩另錄

湯節庵雙燈詩序

湯君節庵以雙燈奉其宗祠吾兄淑郵爲之記於是同
學諸生相與歌詠其事而屬余以序或曰燈非敬祖所
必需也燈而紗焉懸於堂耀於庭觀玩具耳尤非所急
也古者之祭見以蕭光求神於陽後世易以燈燭非其
本矣祭必質明而始行事非如後世之逮聞也燈且不
必設而況於紗今湯君欲敬其祖不祭器祭品豐潔之
是求而飾爲美觀曰以娛神不已末乎余應之曰若所
云是未知念祖之深詩曰孝子不匱所謂不匱者惟其

寄思齋藏稿

卷三序

四

心而已矣隨所遇而不忘祖焉事亡如事存苟有可致
其情者不必其物物關於祭也夫必關於祭而後念及
於祖則其不念者已多矣於其與祭無關者觸於所好
而卽以奉之其祖則其重於此者必無闕於供可知且
今世之祠之不能無需於燈也明矣吾於節庵之奉雙
燈於祖而知其祀之必豐潔而誠敬也節庵曰吾它日
力稍贏尙當添置祭器一切此可以知其志矣抑非特
此而已古之言孝者一舉足而不敢忘父母一而言而
不敢忘父母推此意以論節庵則一燈之美不忘祖宗

其生平立心制行必且光明正大使善可歸親而無貽
先祖羞焉豈特祭先一事已乎昔人論愛君者一飯不
忘君親一也節庵之燈亦一飯類也推是心也處爲孝
子出爲忠臣於雙燈寓之矣蓋古有誤書舉燭而悟進
賢之旨者今以燈之表裏洞徹而外籠以紗明能照物
而不炫其明且得偶以輔如德之不孤焉明哲保身善
事親者以之光前裕後者亦以之吾烏知節庵之不兼
寓意於此然則吾兄記之諸生歌而詠之亦宜也遂以
識於卷端

寄思齋藏稿

卷三序

五

山左試牘存真編序

世有真才乃有真文夫才由於思不思則無才然非才
亦不知所以思思之切理人情能旁穿曲貫警拔動人
者卽才也人惟不能盡其思是以不能盡其才而文不
真文之真者非必超然元箸如白描粉本如疏越希聲
也卽絢爛如春花洞心震耳如鈞天廣樂而所謂真者
故在惟其能曲暢題趣而已孔子曰辭達曰修辭立其
誠夫誠而能達其辭必真韓子曰唯陳言之務去歐陽
子曰文無難易惟其是皆真之說也六經以後文體代

變凡膾炙人口者必其論事指物曲中情理之極故能
真氣迴出足饜讀者之心而傳誦弗衰是以士衡立論
詩賦雜作體有萬殊用心則一況制義代聖賢立言一
切子書異氏語不得闌入其中而又有題界侵溢之禁
往往移步換形有同在一章一句稍增減前後一二字
而題情迥別欲使體正詞醇於聖賢義理發揮曉暢按
之題分語氣復纖毫不隔是烏可以不思乎哉烏可以
無才乎哉夫夸目尙奢者非真才也爲法窘束循循繩
墨之中而理短詞蹙不能有所發明亦不得爲真才必
寄思齋藏稿

卷三序

六

也積學以廣才深思以運才庶幾事理通達精神透露
能不濫題位深入題肩而卓然爲真文山左古聖賢桑
梓之邦詩書教澤千載猶存其人多質直好義不尙浮
華其爲文亦往往清雄自喜不侈聲色而真氣具足自
天下競尙王尤體士子爭綴浮艷字句冀速獵科名而
不顧題理之安致東省亦漸染其風賴歷任學使者斤
斤護持幸不失本來面目某奉

命東來深惟謏陋安能有益於是邦之人亦惟率由舊
章本前人黜浮崇實之意相爲董勸而已歲試行周例

有試牘之刻爰錄其思力清真者若干首而名之曰存
真用示標準且以爲東邦人士勸也若夫本躬行心得
之實發之爲文而不徒於文求之油然經籍之光藹如
仁義之言人真則文自真是又使者日夜爲諸生期者
也

寄思齋藏稿卷三序

七

江蘇試牘存真編序

道光乙酉之正某奉

命視學抵江蘇時前任科試未舉者六府二州兼有拔
貢優生之考計須八月前蒞事郵程來往卒卒無須臾
間也試既周例有試牘之刻乃集諸試卷書院課卷擇
其尤者付之梓得文若干篇詩賦若干首雜文若干篇
而梓人以編名請某昔校士山左有存真編頗爲二東
人士推許今所取猶前志也因亦以是名或曰山左士
風質實爲文多直樸雄健名以存真固宜江蘇士喜淵

博尚考據文多典贍風華詩賦尤絢爛真字恐不足以盡之余曰不然夫文至真焉止矣古人傳世之作不出於真山左序已言之且真非枯槁寂寥之謂必能融會聖賢義理體貼詞氣審其題界毫無虧溢而又能根柢經史精深華湛使讀者心開目爽斯之謂真若貌爲高古墨守講章陳言於義蘊鮮所發明不得爲真彼滿紙塗澤雜而不貫靡而無實又烏得爲真乎今夫雲日輝映空水澄鮮或濃雲鬱興震雷怪發以至嶽峙淵渟星分野絡皆天地之文也春華秋實照爛四時與夫明珠

寄思齋藏稿

卷三序

八

美玉精鏤翡翠川媚山輝此草木金石之文也極宇宙怪奇華麗之觀皆本天然真趣非塗畫裝飾所能到人之於文何獨不然江蘇處江左下游八郡三州所轄過於上江山水之所聚靈秀之所鍾人文固宜甲於天下然使慕其名而不採其真譬如游寶市者華鬘炫耀而誤拾琅玕魚目以爲珠指砒砒燕石以爲玉取磨鎔之鍛銅以爲金雖謂之無一真珠真金玉可也入珠翠之肆而美其綴采象生之花以爲真佳卉雖愚人必笑之夫江海神淵寶藏所出招搖仙花四照萬品在識者善

采而已今使者惟慮鑒別弗真蒐羅弗廣耳至於此邦
信多才士文果能曲暢題義無論爲健樸爲博雅其能
出吾存真之說乎詩賦雖雅麗爲工其務愜題情與制
義同總之不離乎真者近是若夫爲學務求心得體之
於身宣之於文使品真而文自真期可爲
國家用是尤使者惓惓之意諤荷
聖恩畱任倘三年報政士行文風蒸蒸日上某又當欣
然擗管操選政爲多士志進境也

寄思齋藏稿

卷三序

九

辛氏名人輯略序

辛之在天下不若王劉李趙諸族之蕃其載在史籍往
往多忠讜節俠罕敗行述而錄之亦觀法之最切者某
嘗有志焉而未暇也族兄明經月臺氏炳喬嘗輯以示
余自正史雜史下至稗官瑣記隨見輒登約可得十餘
卷皆具載原文詳其書目余喜其博而病其繁勸稍節
以歸簡要月臺氏曰余亦知之然古人著書各有深意
節之既昧其全易之恐乖其實姑存真面以俟能者余
竊心慙其言今觀海曲孝廉淵亭先生此書其采輯之

方大概與月臺同而簡要過之其采各史傳及他書不無刪易原文以從已例然核之事實不至相背至於斟酌去取精嚴有法俾展卷者不厭其煩而景仰之意油然而生末附陳少章紀元要錄節略亦考古所不可少者蓋雖爲一氏之書而史例略具惜不令月臺見之也余因憶在籍時偕兄教授淑郵炳烺姪助教敬堂紹業同修族譜紹業從鉛山得稼軒辛氏宗圖蓋天下之辛具在也其圖該博詳審自慶忌以前與左傳漢書合裕寅以下與唐書合當爲忠敏手定特其末多後人妄增

寄思齋藏稿

卷三序

十

非原觀耳淑郵爲別去其謬附而梓之里中今月臺旣逝兄與姪先後下世多年矣使其闕先生此書必有欣然願効一得亟相贊成以傳之無窮者而惜乎皆不及見也先生之子曰貢文筆典裁有根柢余歲試首拔之今編中亦有其筆淵源之美蓋可想見著述萃於一門先生得此亦足自豪矣

南嶺湯氏族譜序

西鄉南嶺湯生調元從余游從容語及其族譜屬爲序
之余未見其譜而意其必善也湯於江西南豐臨川鄱
陽爲望族其在萬載者竝聚於西鄉西鄉之湯不一獨
南嶺之族尤秀良而能文歲科試游庠序不絕以余所
見若調元薦馨竝暮年岐嶷爲學使所器重顧其族三
四百人耳倘欲盛侈門族無難緣飾傳記引諸湯而悉
附之若邑之李氏合十數族爲一宗者而介然有所不
屑則其不苟爲宗以誣其祖也可知調元云吾湯之爲

寄思齋藏稿

卷三序

十一

氏自南唐相殷崇義避宋諱改爲湯悅余考之玉海及
路史良然又云序世系則斷自悅之裔孫務正遷南嶺
始氏從其朔而祖據其近不以悅貴而遠宗也吾意其
譜必謹詳而有法焉抑余考袁州志引地輿紀勝稱湯
周二仙一爲壽光令一爲南昌令當晉安帝時竝避地
修煉於萬載之湯周山今山故在西鄉而湯與周竝西
鄉著族仙靈窟宅蹤跡可尋其占籍自古派別相承必
非一日也顧西鄉無祖湯仙者豈以志失其名且事涉
仙佛而弗之引耶志稱湯挂冠訪周入山則高隱之士

也苟繫其族烏得以仙外之耶然南唐以前如齊之湯
休武唐之湯嘉惠湯緒湯賁見於載籍今南嶺湯氏竝
弗引而獨引此入宋改氏之殷崇義則其累葉相承確
有所本必不肯漫爲援據以爲宗榮可知卽此以推而
其譜之謹詳有法也益可知已至於蘇譜斷自高祖爲
必適子蓋古小宗五世則遷之法與今世族譜不同湯
氏列世系每九世而一提倣歐譜遺意則見者自能辨
之余又聞其家世敦樸尙義爲有司所旌夫積厚者流
光德之食報將於其子孫調元勉乎哉遂書以歸之

寄思齋藏稿

卷三序

十一

九谿蔣氏族譜序

比部蔣君羽衢以族譜屬序余雖未見其譜而知其必
審詳也蔣君曰吾始籍山東鄒平後徙江西豐城當明
時有富福祿三公由豐遷湖北黃州旋移居湖南澧州
之九谿後祿公返江西惟富福兩房畱今數百年矣子
孫千餘戶世系秩然可據其祿房之在江西及吾蔣氏
之散處湖南北者子姓皆不少以譜牒難徵皆不載焉
惟此兩房居相近誼相親支衍旣蕃有遷居西山者恐
其久而漸失故詳著於編蔣君言如此然則卽取其全

譜讀之亦奚能出斯言哉夫敬宗收族譜之不可無夫人而知之矣然其事踵修者易創始者難蓋前無所承則虞其闕略於是有強援所不知以誇盛大者余嘗意氏族之紊自北魏更改一百餘姓始如普氏改爲周氏拔列改爲梁氏紇骨改胡獨孤改劉侯力拔改鮑之類不可枚舉皆異域人也然則譜可妄聯乎九谿蔣氏之譜旣翹數百年所未有而支分派衍絕無紊漏此其從前紀錄必代有淵雅篤實文人深心譜學者可知而後之人纂輯謹嚴不敢強益所不知以誇盛大而其實遙寄思齋藏稿

卷三序

三

源遠支未始不隱隱相貫亦可謂善成前志者矣往吾同年天門蔣丹林官編修時以外憂閑居銳意家譜欲廣羅放失來吾江西訪蔣氏支族而異同叅錯不能詳不敢妄錄去歲乃出其新譜示余眞詳審而可信者天門屬湖北近黃州而九谿之蔣故來自黃或與天門同宗亦未可知今九谿譜概不之引此足見慎重之心二譜所同又豈有合帶諸狐墓拜汾陽之譏乎夫立愛自親始亦必不妄親其親然後能篤於親而廣親親之仁吾於譜之不苟見之抑天門之蔣譜旣成矣丹林令嗣

笙篴已大魁天下今九谿人才之盛豈亞天門而羽衝
甫官西曹以勤敏見稱方夙夜在公之不暇而能畱意
族譜宗風敦本蓋可想見門祚盛昌於是乎在夫本立
者道生根盤者葉茂九谿蔣氏之興行與天門爭烈矣
遂書以美其族

寄思齋藏稿

卷三序

齒

施半岩新輯族譜序

余爲諸生時往來郡城與施凌滄友因識其尊人琅圃
先生知爲粵東游戎公之嗣且族多秀良兩登賢書爲
城中巨望而未詳其祖所自來也後三十年余門人湯
孝廉子燮以半岩懿行告并屬序其族譜半岩於凌滄
爲從堂姪慷慨仗義以才能稱方爲椽史撫軍署居里
之日少余故罕識其面此譜蓋其手輯余展誦之始知
其祖來自閩至半岩甫五世而倦倦世系惟恐散佚若
此深歎用心之篤且遠也夫譜之立將爲百世子孫計

非但爲數世之親見聞所及而已然必近者不遺前有所錄乃可使支分派別後有所承以絕於無窮凡九族之親自身上下所見皆不過五世故曰五世親盡中間子姓蕃衍親既遞盡則勢亦漸殺本本水源有久而漸忘者昔蘇明允序其族譜亦斷自高祖今施氏自天福公別子爲祖已歷五世族譜之修正在此時抑余與淩滄游久未聞語及此事豈以去天福公未遠支派某某了然心目間無煩記載歟抑志焉未逮歟今半岩方効用撫轅一切文案鉤稽出納之不遑而能篤意於此其寄思齋藏稿

卷三序

五

敬宗收族良爲可嘉湯子燮曰施君多陰濟民生事嘗有以衆販私鹽告者營員慮其拒捕請以火器往君力言於撫軍以爲此小民逐利非真梟不足煩兵衆以是獲全其厚於仁類如是至其先世世敦孝友鄉之人能言之記曰衆之本教曰孝惟能孝於家以施於宗族故能德及於民卽族譜一端見之矣余旣歎半岩之賢克紹其前徽且卜其族之必大也遂書此爲序俾子燮以歸半岩惜乎淩滄已逝不獲以此言相質也

辛氏義學兼行義田冊序

廣義學爲義田其施博而事難然義學之建工材爲先
實惠之被於士尙有所待而惠亦不能它及義田積穀
以賑荒且可備培養士子之資惠均而事切意良善也
其儲蓄宜裕其規畫宜詳其量入爲出隨宜通變俾財
可久而惠不虛總恃行法者虛衷斟酌實心經理期無
失乎立法之初意而已吾族在萬載有辛半縣之稱生
齒無慮萬餘惠卹之難有非范文正義莊法所可例者
舊有義學會田司事每難其人近得公舉廉能之士同
寄思齋藏稿

卷三序

七

心經紀一切井然今年諸尊長以義學不如義田也推
廣其意務省浮費益置田積穀爲備荒計其花紅盤費
仍舊旣與諸紳士詳訂條規族之人僉曰盡善質乎先
生製序弁冊首吾兄淑郵又爲述其例意有欲速近名
之戒所以紀原末圖久遠者二篇之文詳矣某不敏復
何庸贅辭哉竊惟利之所在有舉莫廢例之可援相諒
爲難花紅盤費例所常有固闕給不可矣賑荒雖不數
見然行之不慎可一舉而立竭積歲之藏倘虞其易竭
也而持重過當有可給之賑資待多餘於異日舍現在

應舉之義而虛冀將來待增之田不惟嗷嗷之口將援義以相責亦大失義田立法之初心矣反是而勉徇衆情竭區區數千把之人以頰饜萬餘人之求勢必立窮而義田且終至於敗然則謹守規條權衡情勢使惠周而財不匱用節而恩不靳與一切隨宜調劑得不於司事諸君是望乎哉余行且入都他日聞邑歲頻登族無賑貸之煩有救荒之備而不必用而穀日以積田日以增也族之人科名疊見領花紅赴公車暨謁選來京者于于然且日以衆也旣以徵

寄思齋藏稿

卷三序

七

聖世家給人足之休且以見吾族睦婣任卹之美與衣冠之盛而范氏義莊不得專美於前此則區區隱願所私愜亦族中諸君子所同慶也夫

送雨亭周邑侯序

雨亭明府周侯將去任邑人士既各爲詩章以頌政德又公製錦屏爲序以祖其行而余以尊翁二南先生年誼辱侯禮遇最優尤不能無言也侯署事才數月耳邑之人無坊鄉風澁自紳耆吏民至于婦孺罔不同聲讚頌子產誰嗣之歌叔度來暮之謠不是過焉何施而得此歎或曰侯能吏也縣之土籍與棚民爭分合考額好事者愆怨之一邑囂然至于罷考自前撫秦中丞及學使者至郡邑長丞莫能諭禁已奏准停考行且議罪矣

寄思齋藏稿

卷三序

文

溫中丞莅任特委侯署吾邑借舊尹張侯筠亭按其事下車卽宣示中丞嚴檄名捕首謀及在事者乃相與警慄屏伏託諸廩生紳士求收考侯察其意頗誠以便宜允之會溫公調縣人部控者音且至謂部奏准酌定章程分考可望矣則幡然如故侯立召諸求考者剴切諭以禍福而督輯諸應逮益急於是衆心感悟投考至于餘人侯復與張侯設法杜鎗言嚴場規內外肅然乃扁門三覆之得解額與往歲等爰具其事於上憲以聞得旨允考邑之子弟所以紆衿佩觀光庠序圖上進不終

停考邑之人得不陷於重辟者侯之力也或曰侯循吏也攝篆數月審決新舊訟獄以百數竝深得民情無株連無狡脫又善爲開導所勸斷兩造俱翕然允服民喜其仁明而恐其去之速也凡積年陳案俱以及侯訊結爲快侯曰以勞然侯不辭也天久不雨侯齋戒步禱甘露立注土棚二籍不和久侯曲體輿情試事畢仍請於府以分額爲便事雖不行萬人感之其自奉儉約其廩士豐隆其政簡其刑清其吏役無擾民雖古循吏何以加茲余曰非能何以爲循非循何以言能蓋火烈民畏

寄思齋藏稿

卷三序

九

故鮮死水懦民玩則多死侯不忍姑息以成民罪而執法嚴防轉已停考者使得卒考侯之能也卽侯之循也詩曰不侮鰥寡不畏疆禦侯之聽訟彊弱胥服焉盛暑遠鄉往返烈日中勘驗數處日結案六七以故無留獄暇輒親課書院評隲中古法案牘之餘從容文翰教澤興焉養廉外不名一錢而賤塾至千餘金不以屑意其循也卽其能也往者筠亭張侯署茲邑以賢明稱今縣人戴侯若過於張侯者豈新舊殊情歟抑以同一廉能所感有深淺歟侯澗水名家曾太父理齋公太父讓谷

公政事文學有聞於時而尊翁二南先生以癸卯賢書
現官河南歷四任著廉聲今侯拔萃起家令吾江右所
至輒繫人思若此可謂無忝清白吏後者矣抑侯嘗自
述曰吾官南豐南豐人德我爲留匾設餞然吾居官無
它巧惟不作一過當事出一不信語而已夫事無過當
則不以刻爲能不以縱爲恩思不出位而職罔不盡也
語無不信則信必近義言必由衷而民莫敢不用情也
然則侯之所以爲循爲能克紹其家聲者蓋有自來倘
守是以不變雖宰天下無不可區區百里云乎哉天驥
寄思齋藏稿

卷三序

三

之才一日千里侯行矣敢以此爲贈他日以質二南先
生欣慰當何如也

岳忠武王眞蹟跋

忠武事蹟史傳詳矣其純性偉略與儒雅之度不惟南渡諸將中第一卽伊古以來豈可多得昔見王所書墨莊楊本風骨迥整彷彿其人今年得黃氏所梓文集內有行書尺牘三雖木板摹印未能逼真而勁秀之姿故在茲芷鄰儀部復出此眞蹟見示蓋王以答李忠定者筆畫絕類顏平原一腔忠憤形於翰豪蕭容展對宛見當年軍書旁午磨盾走筆時較一切榻本尤爲生氣迴出洵可寶也已抑余考宋史忠定以紹興二年宣撫湖

寄思齋藏稿

卷三跋

三

廣兼知潭州旋被徐俯劉裴劾罷提舉西京崇福宮至四年冬金及僞齊合攻廬州忠定陳三策詔付施行雖有督兵渡河勞軍江上之旨然史未言忠定仍宣撫湖廣也是年忠武克復襄漢二郡移屯鄂州行營田平廬州似與抵淮語合矣究無與忠定交涉實據惟五年忠定除江西制置大使兼知洪州其明年宋師與金相持淮泗半載忠定有速遣驍將自淮南犄角夾擊之奏是時王正移軍襄陽以圖中原此答忠定帖所謂直抵淮陰者當在此時噫兩賢忠悃相孚雖官守異地而惓惓

報國書笈要約無間若此使當日君臣一意恢復卽一將一相已足其奈長城自壞何覽此帖能無慨然覃溪先生云寶真齋所藏手簡十一帖外尙有單騎帖某愧孤陋均未及見然吉光片羽倍覺可珍已芷鄰其寶藏諸

寄思齋藏稿

卷三

三

晦木山房詩集跋

右年友趙君苾畦自編詩若干卷同年恩兩堂督閩學時嘗爲序之矣一日下問及某同年中某知苾畦最早苾畦未嘗自謂能詩也嘗囑題其圖卷謬蒙許可因出其所爲錢吳越王鐵券歌見示瑰瑋典麗如讀昌黎石鼓歌及義山韓碑詩余始望洋自失今乃得更窺全編幽遠雄秀無美不備則益愧以服至于纏綿倫紀之際與其咏古懷人諄勸士民諸作忠孝子諒仁慈之性藹然行墨間卽偶然游歷述風土寫物態亦皆詞近指遠

有雅人深致蒞畦不自謂能詩而詩工乃如此此亦足以知吾蒞畦矣諸同年以詩自鳴者無如穉存船山然兩君通籍後皆官翰林心閑而力專多巨公朝士往來助其見聞其工詩固宜而蒞畦厯官外縣日對吏民間出伺候上官方簿書鞅掌奔走勞形之不暇一行作吏此事遂廢宜不誣也乃讀其詩自官閩後益清老雅健入古人之室視穉存船山詩足以傳世同而所處似較難焉則使其從容著作之林發爲詩歌以和聲鳴盛玉佩瓊琚大放厥辭所就當更何如或曰詩各有其才不寄思齋藏稿

卷三 跋

三

在境之勞逸資之多寡使穉存船山與蒞畦易地而處其能詩均也然境勞而資少其難成尤爲可貴或又曰詩必有山水之助故金閩諸彥有不及山澤之臞者矣蒞畦浙產而官於閩崑壑靈秀宜萃於詩然官浙閩者不人人能詩也夫豈非視乎其人耶蒞畦天性敦厚和平而邃於學與之道古及時事所見多出人意表其居官善體物情有政聲是蓋有立乎詩之先者焉不待以詩見也夫不待以詩見而詩卒足自見而成功又居其難則此編不倍可喜乎哉某舊忝清華雖居遠山水無

案牘之勞顧拙於吟咏且疏慵不自收拾致無隻字可
自信而傳世讀蒞畦詩竊自恧焉既承命輒署管見因
并述傾慕之懷且以自勵

寄思齋藏稿

卷三跋

十四

喬筆珊文稿跋

年友筆珊五兄既逝厥兄補文比部出其遺文若干卷
示余經丹林同年手選以爲宜梓行者余讀之清雄典
瞻能發揮理趣而斂才就法往往批卻導窾破空而行
題情畢赴不墮時趣亦不襲古貌洵卓然可傳也自文
風飢疲士皆務塗澤浮藻兼詭僻以希時好既雜而不
純近乃一矯其弊名爲清真又失之枯淺影響於聖賢
義旨仍罕發明今觀筆珊文清而有骨麗而有則奇而
不詭於正與丹林文皆足以羽翼經傳維持風氣丹林

精於法筆珊富於才一則結構謹嚴如程不識之刁斗
自衛也一則疏宕雋快如李廣之屯舍自便也雖趨尙
不同而均爲文陣雄帥余嘗謂筆珊天分優丹林學力
勝聞者胥以爲然二君皆楚產也 國初鍾陵稚川同

年進士文名甲天下今二君適繼之楚實多材信哉抑
丹林文余旣讀而序之矣余交筆珊久與丹林同其才
學之博試律之美素所稔知顧未知其精於制義乃爾
則自余而外得見筆珊文者固少也以文之工而有裨
於文風經義豈忍使其無傳因加墨以歸黼文俾亟梓
爲學者勸且以質丹林爲何如也

寄思齋藏稿

卷三 跋

三

徐秋潭三沙紀事跋

古軍旅詩見於風雅者自清人刺奔師擊鼓刺阻兵無
衣志同仇外多朝廷慰勞將士及褒美元戎之詞而非
其帥自作也故宣王時吉甫作頌常武諸章殆出其手
豈方叔召虎皆不能詩哉當由詠歌風烈私述不如國
紀之公耳倘使方召諸人自寫其行間所歷當必有更
詳於詩所云者三沙紀事草將軍徐秋潭先生開闢建
寧所作也當海寇蔡牽肆劫閩洋出沒無常勢張甚然
皆倚三沙奸民爲閒諜自先生由浙鎮閩移節其地初

至民媮兵懦望賊輒遁先生激厲士卒身先奮勦賊敗
去乃益設方略嚴偵緝勤訓練明賞罰偕文武大吏壹
力同心卒克殲渠掃穴滌淨海氛其總師鞠旅之功有
國史不能盡詳者今觀此卷咏平陽義民之助捕則平
日恩澤洽人可知咏三沙鄉勇從化則紀律訓教之嚴
明可知署陸路提督而濱海沙澱之民相送涕泣率舊
勇堵截有功而大僚助糧畱戍則忠悃寅恭之孚於上
下可知至於礮臺釘桶之設施竹城漁艇之禦防隨機
應變亦略見於詩若夫平海之頌陣亡之錄知己之感

寄思齋藏稿

卷三 跋

三

戰馬之傷至性所發皆足激起人忠義之心蓋詩本言
志必先有志而後有詩先生雖官總戎遇州縣冤誣平
民請兵擒治者必毅然持不可且怵以利害至邪匪所
潛集經訪實立遣卒馳捕全獲乃已蓋其心存忠義以
戢暴安良爲志不特兵率其教而民亦懷其德故其爲
詩多慷慨質直無風雲月露浮語試使方叔召虎生於
今日處先生地其志與詩亦不過若是已矣嗚呼此豈
可多得於今之世耶先生官西安將軍二年軍民綏靖
近以條陳屯兵教養事被議左遷辦事烏什秦之人蓋

日祝將軍早還也世本文階巨闕工詞章而先生獨以
武功顯韜鈴稍暇亦時以篇翰自娛爲人雍容儒雅所
至賢士大夫咸樂與交某官京師適先生入覲一見於
朝房心敬焉而未暇深言也今祇役西來數得親炙聆
其緒論則益歎以服久乃出此草見示某喜其人愈樂
觀其詩因爲跋以歸之先生兼工書取法古帖無時下
習氣吾聞善書者意在筆先先生之書殆與志在詩先
同一筆意然則先生益可知也已

寄思齋藏稿

卷三跋

七

秋潭詩草跋

秋潭先生三沙紀事草某旣讀而跋之頃復出示此編
蓋盤山扈蹕暨其游歷所至卽景興懷因事畱題及
往來投贈之作雖古今體各殊而性情之溫厚識趣之
超逸俱可想見其五言清妙者直可嗣響錢劉七古清
雄處亦時彷彿東坡洵深於詩者也三沙草祇紀一事
此編則并其居游動靜而悉傳之古者賦詩見志然觀
志於臨事不若觀志於平居爲尤詳欲知先生者合二
編觀之亦可悉其崖畧云

後街晏氏譜跋

晏君廷頌茂才家譜一帙余族叔質孚先生旣爲敘其原委而茂才復屬余識其後余讀之瞿然念盛衰靡常而歎茂才維族之殷也後街晏氏前明時爲邑望族列學官弟子員登賢書及仕版者代不乏人三世以後子多八人六人生齒非不繁今其祖居旣爲他人所得見存男丁至不滿二十矜士自廷頌外無聞焉蓋常盛之不可保如此而其支派紀載散佚至據醮事簿以叅世系而可疑滋多豈非文獻不足耶夫由盛而衰數也數

寄思齋藏稿

卷三

天

無如之何也至於世族本末支屬親疏及其生沒卒塋父以詔子兄以語弟筆之於書無使脫漏以遺後人似非數所能難而亦竟不可得吾知茂才於此必嘗廢卷三歎也然惟如是而譜正不可以己其盛而著者且不免殘佚矧衰而微耶古人云不能紀遠乃紀於近昔蘇氏譜蓋斷自高祖以下其前具大概而已今此帙於本支頗詳旁支及幼房雖不甚具闕疑紀信於譜法合抑其心尤有所不得已焉使其族之人見夫前之蕃衍如彼後之式微如此也乃至名字湮沒世次斷絕而莫可

考因相與興懷水木惕然顧慮交勸以邁征各力於四
民之業冀恢先緒而振起其宗風晏氏復興其在是乎
是則茂才立譜之心也已茂才尊人志切敦本手錄系
冊而茂才續成之可謂世濟其美者遂書此爲跋

寄思齋藏稿

卷三跋

无

馮鵬海某錄跋

忘其書名

金石宗

沈州試院見壁間字幅科斗龍鳥諸體悉備喜其奧博
審知爲滋陽太合集軒之昆鵬海所作集軒名進士有
治聲真難兄難弟也旣而集軒出示此本余惟結繩而
後書體代變學者欲知古文必考金石顧石易泐而金
可久且崇碑巨碣不如金器易摹宣和博古圖所載皆
金器也古金器著錄多矣然非親見而手搨之不足爲
據如一比干銅盤銘也嘯古堂集錄與汝帖所刻迥殊
其它可知往見翁宜泉前輩所搨錢譜至於極古刀布

極小洋錢字畫人面花紋細入毫芒歎其精妙今馮君此本摹搨之工殆欲相亞且攷訂精審信而有徵不獨古器與銘賴以不朽其開益後學亦不少也歐陽子有云物聚於所好而常得於有力之難余謂有力非難好古難耳馮君一游山左而所得已如是自茲以往游歷益多不盡收天下金石文不止豈非好之驗乎因憶吾郡昌山峽水迅激多壞舟其崖勒文字奇古不可識相傳有能讀者金船立見余嘗舟過其下以程急未暇登覽也博古好奇如馮君倘一過焉其必有以辨之矣

寄思齋藏稿

卷三 跋

三

郭竹園安雅居題跋

雅之義訓正而正未足以盡雅越人安越楚人安楚楚越之人非皆不正也以尙囿於俗君子弗安焉夫惟直而有體婉而多風秉經而酌雅能度越乎流俗若是者雖賣卜如君平鍛竈如叔夜賃舂如伯鸞溷跡於俗不失爲雅也不然卽揮玉塵效夷甫薰香效荀令傅粉效何郎雅自脩飾無解於俗雅俗之分惟視其志趣而已是故進爲訐謨定命退爲明哲保身真雅人何適非雅余姻友竹園七兄少好學工文澤躬爾雅爲名諸生旣

服官能於其職雖簿書鞅掌胸次超潔有雅人深致因
取荀子語題其居曰安雅蓋世有忌方正而喜圓通必
無惡雅而樂俗者且古小雅之才七十四大雅之才三
十一吾以是尙友亦已多矣願與竹園共勉之

施繁安行實書後

某少時聞父老往往言黎源溫上貴之叛賴官兵勦捕
奔竄鄰境被獲邑人得以安堵而未詳領兵爲誰今閱
此記乃知先生奮勇追擊之力其有功吾邑實大顧考
郡志萬載武職未列先生名惟見於袁臨協鎮下二把
總中意其時因勦寇特調防守事平卽還非專駐萬載
故志從略歟要其爲桑梓捍衛則一也士之志節當觀
其大當先生家貧弟幼躬勤勞以資事蓄稍贏餘卽爲
兩弟擇配俾壹意功名而不先其子所置產悉公諸弟

其天性友愛有士大夫所不能及者卽古所稱薛包許武何以加茲然則卽不以擊賊軍功顯亦可稱士中豪傑矣其垂裕後人也宜哉

寄思齋藏稿

卷三書後

三

萬載試院記

一縣之試可云院乎天下書院無大小皆稱院矣奚有於試惟是試院雖一縣之建其成也亦各有時或地無可營或財不易集或不得其人以倡之而董之則皆不能成事而得人尤亟所謂有人此有土有財也吾邑應童試千餘人向皆就試縣署地旣不足容試几坐具皆先期送置遲則無張處風雨之侵不必言也鄉之人尤苦之嘉慶丙辰蕭山進士來侯莅吾邑旣縣試集紳士謀焉邑故有守備衙在縣治西後員裁衙廢而基存於

是紳士請以萬本立名公買其基并拓買旁地建試院
顧建費尙無所出也乃擇紳士之公正爲諸鄉信服者
及廉敏有幹才者如張亨衢劉時耕等四出勸捐并董
工作連值 國家大慶鄉會

恩科疊舉邑之登賢書第進士者踵起其援例急公登
仕版者尤衆至於連阡陌善居積挾范蠡術泛舸四方
竝家有餘蓄樂於赴義聞諸勸捐及董事至皆踴躍爭
先輸助不數月得七八千金遂鳩工庀材相諸位置所
宜及就試閱卷者所便堂室漏庖一切具備踰年葺工

寄思齋藏稿

卷三記

三

并以餘貲買田若干爲脩葺費及鄉會試贖適某告養
旋里周觀庭廡則已輪焉奐焉規條備焉因以歎首事
諸君經理之勤暨諸鄉人義助之美而尙未有記道光
甲申某視學江蘇而吾邑適脩縣志郵書來俾補記之
余惟縣試者士子進身之始也始進重則由此而上進
也益重夫以有明迄今數百年欲建之試院一旦而克
觀厥成俾諸童得從容展藝知就試之榮而益用自愛
人才將蒸蒸日上豈非眾正相扶士風丕振之會耶抑
詩云靡不有初鮮克有終昔司事諸君創院之法善後

之規良爲詳盡謹修而審行之試院千百年長存可也
易之爲道一陰漸進則爲姤五陽遞進則爲夬衆正方
盛有一陰邪焉伏於其間牽引其黨險而健訟則君子
將恥與爭而相率去之消長之機不可不察夫試院有
田有租倘司事者利其田之入不圖久遠甚者生事開
銷假公以濟其私租旣虧而田不可保微特鄉會驢漸
廢也卽望試院之時加修葺也得乎如此則大失前人
剏院之意乖鄉紳士樂助之心彼應試者亦將苟且媮
薄而不知自重人才興替所關匪細保泰持盈之方可
無審乎邑自是役後有郡城考棚之助近又將有寶興
堂之舉足徵吾邑好義之多風俗之厚然愚以爲統在
司事得人舉能公正廉敏如建試院時之首事則可也
請以是諭邑中諸君子得無以余言爲迂乎哉遂書以

歸之

重修龍河書院記

天下郡縣皆有學學之外皆有書院爲樂育英才計至周也然學之體制嚴自 聖廟經閣署宅外可爲諸生肄業地者希矣司鐸雖儒官有案牘之勞有徵調之赴旣鮮暇日與諸生講學諸生以其官也亦未便數數進謁故師生恒渙而不親且所教祇庠生膏火弗豐就學者少惟書院專爲講授設地廣而貲饒生童皆得受學其主講多鄉先達有宿望者無官府迎候之煩身閑而任專生徒亦樂與親朝夕請業無異家塾其心安故其

寄思齋藏稿

卷三記

五

教易成余故嘗謂學者親師取友書院較郡縣學爲尤切也吾邑之有書院自乾隆九年始其初建於龍山二十年遷龍河其膏火所取給及捐建增助原委姓氏前志詳矣自遷建訖今近七十年歷時旣久堂宇齋廚一切漸就傾頽學者幾無可棲息連值邑中公事頻興貲財告匱衆咸欲新之而未能也先是邑太學宋寶承先世遺產饒蓄積甘節嗇將有所用之至其子海嶠善體先志凡縣中以義舉請者必立應已而疾卒遺言以書院屬婦聞氏至是其孤壽昌以母命請於官願捐金六

千爲修建費於是訊吉庀材增廓前規房舍軒楹有加於舊爲屋若干間經始某年月日落成某年月日邑之人升堂入室仰觀旁矚美奐美輪罔不嘉歎乃走書京師屬余以記余聞之禮云賢者積而能散非儉何能積非仁何能散仁莫大於興賢育才今海嶠席先業繼先志甘出其財爲一邑教養人才計可不謂仁矣乎其婦聞氏能教其子以成其夫與舅之美慷慨好義得之閨壺此爲尤難史稱巴陵寡婦清以財自衛始皇嘉其貞爲築女懷清臺彼非必有惠濟桑梓之功也以今視

寄思齋藏稿

卷三記

美

昔賢實過之抑余更有願焉魯厚畚師之記書院膏火田也謂士必脩禮陳義厚於自養無負乎養士之典若以膏火有田徒爲贍卹貧士之具實應憎且羞矣今斯院之成也余亦望居是院者居仁由義務爲明體達用之學以遠到自期若徒視爲廣夏之庇寒膏火之足贍其生焉豈惟失士人以道自重之意抑恐辜捐建者之功而爲巾幗羞也學者其勉旃

尙志書院記

某少時嘗從巢匯堂先生游知其文行之超而未詳其友爲何人也聞有書院曰尙志在城東北蓋先生舊與同志講學處先大夫課某嚴不令輕出家塾某性亦落落寡交游雖鄉先生名蹟近在城隅未能一往觀也通籍後稍稍來往諸鄉然於城居反略比官京師十餘年告養歸則尙志書院已煥然重新矣先生之子茂才飛鵬偕諸世好以某嘗從學先生邀往游焉縱覽形勝周觀庭宇升堂窺奧穆然想見諸先生遺澤及與其後人

寄思齋藏稿

卷二記

七

燕談竟日皆郁郁彬彬有詩禮家法則愈歎諸先生弓冶之庥因題聯以紀其盛今某補官來京又十餘年矣茂才郵寄十二先生傳見示某始得悉諸先生之行彌歎匯堂先生取友之端且廣也茂才并有書屬爲書院記雖然記則奚待於某哉諸先生結社之由與尙志命名之義則汪先生岷山齒錄序已詳之諸君子繼志肯堂之美則有邑人士題咏卽某聯亦已及之又奚藉記爲哉抑某竊有進焉孔子曰父在觀其志父沒觀其行夫志必兼行則非徒志孟子言尙志必曰居仁由義居

由者行也夫必先明乎仁義之是非而後所行不疑此不可以無學矣若徒高自位置以爲不爲俗伍動曰吾以明道自期也以希文自待也微特好大言而遺切近且恐悞入於非仁非義而不自知岷山先生亦云居敬窮理反身實踐某以此二語尤爲尙志要義諸君子旣皆淵源家學建書院以永其澤入斯院也必皆相從講學使行與志副無負先人之訓可知古者一處士歸鄉鄉之人薰其德而善良者幾千人況合十二先生之裔各尙其志各敦其行以風示一邑乎師道立則善人多

寄思齋藏稿

卷三記

美

此之謂也風化之成在此矣諸君子其勉之十二先生者匯堂先生外郭肅齋治清龍敬齋治禮郭健齋秉毅汪鷺峯發楫郭景堂落辛正軒魯郭觀堂瀾辛畹堂廷芝汪淮堂發峻王蘊齋昌隆張琢齋焜圭以齒序匯堂先生居九

惜字局樂助碑記

勸輸引附

嘉慶甲子夏有惜字之約諸同志翕然應之領帖四出書者雲集比冬聚帖計釀錢若干足敷製器募工之用懼其易罄也乃購田爲久計歲收其租入而量以爲出初置某所田若干越明年裏源汪君耀字又助田若干於是租饒而用給遣人坊鄉拾字遐僻之阨山蓋水屋罔有弗至篋而收之龕而積之終月而焚之邑境之地殆無片紙遺字矣然尙未有記也又數年司事諸君乃謀鐫樂助名於石而屬余記之夫事無難易期於善善寄思齋藏稿

卷三記

五

無大小難於同以字爲聖人之制而宜惜也其於敬教勸學所以尊信聖賢道德之意尙非其大者人各私其力愛其財肯出以應不急之務乎乃帖甫出而諸君子競相勸輸或爭輸恐後不期年而事集以此見人心好善雖小樂從又況其大於此者乎輸旣集曠數年未刻石登名而輸者不疑雖司事之賢與事會之偶阻足以相諒亦見其風俗近厚也抑余有慮焉夫義舉者衆慕之名而必出於善必不肯於聖賢乃不惑於非義之義是會也積租稍贏或欲兼爲他用然與其動而失正也

無寧靜而守之使義皆由正常如惜字敬聖賢之意而擴充焉奚不可也不然卽止於是焉亦奚不可也諸君子善保是哉

引字何以宜敬乎曰聖人作也聖人之制多矣獨字宜敬乎曰形而上者道道非字不著形而下者器器非字不傳字者聖心之精而天地鬼神之所憑也天非字無以紀寒暑地非字無以表山川鬼神非字無以昭位號若乃明義理通古今識事物人於字尤日用不可離者易曰百官以治萬民以察聖人之制莫精於此矣食人

奇思齋藏稿

卷三

四

者米穀也衣人者布帛也教人者聖賢也有字而聖賢教養之法乃流惠於無窮是以天地啟之鬼神重之能敬者予福不能者予禍歷觀陰陽家言善惡之報豈虛也哉顧字之當惜夫人知之而其事在不急或事叢地狹廢紙紛乘猝不暇理冗雜散弃勢所難免至於飄溝墮溷過者亦不便檢拾勸惜之文徒虛語焉往余在京邸見有爲惜字會者釀錢若干置篋千百具募專人令散懸諸官舍民居及街鋪寺觀囑有字紙自投其中月一往收人人便之又時遣巡行坊巷拾道中所遺以故

字無汗踐之虞其與是會而身若子孫登科第者亦往往有焉余既喜其法之善而樂爲邑之人告也已又聞省城亦有之蓋心理所同法不可易擬商合同志爲茲局并購田垂久遠貲不期多足敷置器贍役之用而止諸君子以爲何如也以吾邑好善慕義之多其身若子孫日讀聖賢之書享字之利而思所以致其敬惜已不言而同然聞是舉也必有欣然願輸者抑善行宜果諸君子既皆有是願望相與果之桂籍之登實兆於此斯亦善果之一也

寄思齋藏稿

卷三記

望

宜春水月庵惜字亭記

古之教者德行本而文藝末字爲六藝之一尤其末焉者也自學者舍本趨末以文章爲干祿之具於是德行衰而文字濫宜春袁生大梅從余學一日以水月庵惜字亭屬余記蓋生嘗從其宗人屏垣南莊肄業是庵今歲設帳爲忠毅公裔楷元諸先生衣冠望族醇謹善守家風後進多所造就諸同學醵金建亭歲時文會其間志師友之樂其顏曰惜字蓋亦則古稱先毋浪費筆墨之意云爾余聞而趨之抑余竊有感焉敬聖賢者以實

不以跡達道五倫忠孝爲先聖賢教人之實莫重夫此
故曰爲下不倍曰爲人孝弟則鮮犯上作亂世以字爲
聖人之制宜敬而惜之夫字且宜敬況聖人之教而可
不遵乎不惜字且不可況悖聖人之法而不得罪聖人
乎往者吾萬邑士氣本厚自考額之爭激而已甚士皆
以黨同爲義抗上爲勇誣上爲智有一二守正遵法之
士反羣起詬病匿名之帖四出造言干禁字之當惜莫
大乎此嗚呼此鄉先生之責也宜春雖密鄰萬載然其
舊風淳樸又得諸先生明厚長者恪守先型以化導之
寄思齋藏稿

卷三

聖

方將惜字以敬聖人自無慮至是夫淫詞謗牘一切傷
風敗俗之字誠所宜惜若淵源忠孝扶翼世道舉之口
而筆之書崇正闢邪以盡鄉先生父兄之責以合古教
者德行本而文藝末之意其勞不宜惜也諸君其善師
之於以仰副

聖朝取人育士之旨綿陰隲而登桂籍其功有大於世
之所謂惜字者至於會規章程一切久遠之圖則諸君
自審之非余所知已

胥氏宗祠祭屏記

祭何以有屏神所依也尊者坐必設屏君子事亡如存祭之日爲屏以依之庶神之妥而饗焉爾或曰屏謂之樹古禮天子外屏諸侯內屏禮記言魯太廟制云疏屏天子之廟飾也正義疏刻也刻於樹屏爲雲氣蟲獸然則非卿大夫以下可用管仲樹塞門孔子譏之今之屏毋乃僭歟曰古禮豈可泥哉自漢以來屏之通用久矣漢書陳萬年傳召子咸誠牀下咸睡頭觸屏風趙壹傳壹柴車革屏魏志以白屏風賜毛玠晉書吳隱之以竹

寄思齋藏稿

卷三記

聖

蓬爲屏風唐宋詩人用屏風者甚多皆士大夫也且今之圍屏謂之軟屏與禮樹屏別生則用之沒則設而祭之烏乎僭然則古祭何以無屏也曰古者天子諸侯祭太祖及四親二祧皆各就其廟之室而祭之主各有祐不須屏也惟大祫乃出羣廟至於太廟而合祭之各昭穆筵几所依當必有其物焉禮文不詳耳至於卿大夫士則各祭於其廟之室中主不出堂與今祠堂祭不同故皆不需設屏少牢特牲饋食二禮可證也蓋嘗論之古今異世禮不相襲惟得乎禮之意卽乎心之安而已

天下族有大小位有尊卑其爲人子孫報本追遠之情則一使必如古者大宗小宗之制自別子本支外諸弟至皆不得入廟此在封建之世以適爲重不得不然而求諸祖考及子孫之心皆有所未安若夫俾通族子姓皆得伸其合敬同愛之情則今宗祠之制爲盡善蓋以別子爲始祖凡始祖之子無論適庶其至皆得入祠數世以後支派漸繁神至漸多祠或不足以容於是始較其功德爵位而有配耐與否之分各支子孫無有不得遂其報享者矣享畢則至各藏於寢室當祭則出至

寄思齋藏稿

卷三記

四

於堂而以屏隔之左右配耐各爲桌屏惟始祖中爲大屏昭穆皆拱向焉所以明特尊也吾邑宗祠皆用大屏然或以歲祇冬祭屏不常設臨祭時往往轉相假貸於是吾舅氏胥祠族長諸公殷然念祀先大典屏爲靈爽憑依而假於人非所以敬祖而安神也乃於造祭器之餘特建祭屏并遣表弟君佩來徵余記竊惟胥氏自先茅受封代有聞人當春秋時變卻胥原與吾族之先辛有二子竝爲晉望族胥之來江右遷萬載未暇詳自何時度與吾辛不甚相後卽今人文之盛亦幾與吾辛埒

且其宗風淳厚和睦識者謂其族之宜昌也夫人道莫先於敦本今祭屏之設既不悖古義而皆出於尊祖敬先之誠率是以往必能藩屏其宗族可知語云和氣致祥將必有偉人輩出爲

國家屏翰而益光大其宗者矣遂欣然援牘而記之

寄思齋藏稿

卷三

壘

重修萬歲橋記

邑境諸水城北三江口龍河爲最大匯衆流而東十里許爲康樂橋南北孔道也又其北有別爲各鄉諸水所匯而梁其上者曰萬歲橋橋在縣北十五里雲峯嶺側創於元圯於明復於邑人張鱗後易以渡 國朝康熙中郭鍾成募建石梁雍正十年再修自是民不病涉歷年滋久水激齧遂圯於潦行旅苦之雲峯居人張君介珍慨然念橋據要津旣毀而諸鄉來往跋涉流潦陷溺之可危也且其初張氏實嘗建之謀於房衆商之鍾成

曾孫新科與其姻韓學貴及邑中善士辛易成胥奉川
宋子詮李伯蕃等僉曰宜重脩因命子士昭董其事於
是羣情踴躍輸者輻湊伐石馬鞍山車運畚舁相屬材
具工勤不勸而集興役於嘉慶己卯爲兩墩三洞洞各
三丈六尺墩厚丈四尺橋之高三丈六廣二丈脩引有
六丈步登石闌畢備以道光某年落成而走書京師句
余記余惟橋梁之成載於夏令孟子王政所重然土功
興之在官不如聽民自力吾邑上下區鄉凡塗瀕溪澗
皆隨地廣狹爲杠梁以便行人矧萬歲橋爲西北花塘
寄思齋藏稿

卷三記

吳

白良諸鄉總水所通流雖地衝稍亞康樂其爲輿徒所
必經則一第恐人私其財倡修不易耳今此議一倡而
韓君捐至千四百金餘或六百四百傾囊無少愆以此
見吾邑風俗之厚而倡義慕義之誠爲均不可沒也

功合民間有捐修道路橋梁銀至千兩以上者大吏具
冊以聞今諸君此舉爲桑梓利涉計非爲求旌而實與
旌典之意合是可嘉也已余昔里居嘗道經此橋樂其
風景之佳今聞其重新而喜張君之有成也因記以歸

之

寄思齋藏稿卷四

萬載辛從益筠谷著

男桂辰雲謹輯

書

覆阮芸臺前輩書

致盧西津同年書

覆楊小滄書

覆陳望坡前輩書

覆蔣伯生書

祭文

祭先師孔子文

公祭叔嬭張安人文

祭聞榮松姻兄文

寄思齋藏稿卷四目錄

墓志銘

敕祀昭忠祠左公墓志銘

常德府知府鄭公墓志銘

通政副使喬公墓志銘

家質孚先生墓志銘

傳

巢匯堂先生傳

鄧與齋孝廉傳

劉恬齋明經傳

劉耐村先生傳

外舅聞仲甫公傳

贊

宋應占像贊

袁朋錫夫婦像贊

仁山和尚像贊

施克振行略贊

壽序

教授章雲門同年壽序

郭位南壽序

袁肯堂學博壽序

施廷誥壽序

黃傑老壽序

袁天山壽序

教諭王窰墟同年壽序

鮑母周孺人壽序

漆母蕭孺人壽序

袁母何孺人壽序

陳母繆太宜人壽序

訓士文

寄思齋藏稿

卷四目錄

通飭山東士子文

通飭山東武生文

二

覆阮芸臺中丞書

前呈拙簡猥荷德音賜覆獎飾踰涯榮愧交集承示漕務情形河爲漕累漕非爲河累數語三復紬繹曠若發矇非於國是民生洞悉關切者不能道此因思今日當事諸公有明知其然而故與人相左者卽如酒商重利之弊人人所知晚前疏非欲科舉但欲設法以甦丁困耳當事者不但力爲開脫反言官貸不如私借是斷疲丁受恩之路而啟奸商專利之門也讀浙疏夾片語堪爲憮然頃聞浙幫官貸之項被道吏指稱部費扣其十

寄思齋藏稿

卷四書

三

之二其旗丁實領者又爲吏扣抵酒商私債酒商仍以作本放利如故其奏革之周書吏仍令其子易姓承充辦案如此所謂不誠無物想老輩聞之當爲一噓也又聞近來催漕委弁多至百餘需索土儀所在爲患江浙幫丁來京者皆言阮部堂督漕時所委不過數十無擾累而漕行甚速卽此一端足見要束簡嚴實澤被人矣某學識淺陋今古無所通曉竊以明作惇大道宜兼濟時有偏重處今日因循之習似宜以明作爲先然不得其人則明作或失之紛更惇大遂流於寬縱必具大學

問經濟者乃能善此江西民風吏治近經整頓大有起色間有一二闌冗守令亦當如蓬生麻中久而自直知秦境高懸自能洞察耳某備職京員毫無建白遽擢通叅雖清苦倍前事省官閑藉可藏拙惟竊祿素餐報稱未能深用慙慙幸叨同館後進尙冀大治不棄頑鑿錫以箴規幸甚

寄思齋藏稿

卷四書

四

致盧西津同年書

都中重晤別又三年每憶溫度雅談動多開益愛而不見我勞如何鎮江衝要官此不易吾兄久居方面習吏事加以廉明篤厚當復游又有餘昨得次兒師雲揚州寄書知舟過貴治重承雅愛親如子姪感謝滋深書中盛稱兩世兄文才器量之美伊自愧如葭倚玉兄後人若此箕裘克振可爲抃賀近來文風殊詭八股一道眞傳漸失大約有書有筆總可獲雋王尤體不宜效諸僻書亦奉例禁然各省用此取中者仍復不少要之十三

經國語國策及史漢唐宋八家儘足敷用無需僻書也
國初如熊劉李石臺戚价人及後來陳惺齋俱可效何
必王尤今年春闈元墨一出士論譁然其文蕪穢原不
足道然它尙多可采往往以屬對組織見工試帖詩近
亦復然但對偶能工雖於題不必切亦足見取故寧密
而湊無疏而直寧濃而瑣無澹而龐大抵務繁飾而少
真氣此可見近來風尙矣去年考差金人示戒詩有云
棘舌難追駟楊毛避放豚此雖詭遇倖取然不可效能
者有心維挽姑從衆所好擇其近雅者先投其喜而漸
寄思齋藏稿

卷四書

五

歸於正務使銜華佩實雅俗共賞爲妙不然無益也兄
以爲何如可與兩世兄言之否書法歐趙俱可總須成
熟耳羽便聊書數紙順請台安不具

覆楊小滄書

兩接手書情致斐然孝子白華之思志士青雲之氣具形毫翰雜誦再三謹悉一切竊維顯親必在揚名方今登明選公賢俊滿朝有道則見此其時也足下鍾袁山之靈秀席世德之清芬游思竹素尚友古人方養豹姿以圖鳳舉誠本計也第事賢友仁交游之益古人不廢鄉中見聞有限雖鄴架足供漁獵然古今時勢既有異同德業薰陶必資師友聞阮中丞芸臺先生王學使定九先生俱有延攬扶掖之意定九先生學問不敢知其

寄思齋藏稿

卷四書

六

志行皎然可稱至芸臺先生品望學識卓卓爲當世所希誠朝夕與居不惟有裨文學於道德亦必有所增長以足下之才之美與志趣之不苟而又英年好學二公必樂爲引進豫章一水之便何難俶裝一行而兀坐荒邱乎極知送往事居兼有向平未了之責然家事旬日可決者決之不則且置之幸雙慈康健耳目聰明諸令姊時時歸寧俱精敏可倚託且聞尊閫賢能彬江內家一切且資料理足下儘可無內顧憂矣粵東姻期一書可畢粧奩稱家有無愈儉愈妙惟令昆莖所未卜但不

圖風水姑先淺厝亦可入土爲安省會匪遙縱有急召
數日可達足下惟當壹意科第以揚名顯親爲要取科
第非它詩文經策而已此數者皆足下所優然閉門造
車必需出門合轍萃天下才能畢力於此以爭得失欲
使有目其賞亦不能無師友觀摩之助豫章之行尤不
可已況德業所資又不獨爲科第計已乎至親庭營養
得當道吹噓更易爲力度足下此時尚非所急又聞足
下學甚勤苦夜讀常至五更此又不必學問之道藏焉
修焉息焉游焉國語曰士朝而受業晝而講貫夕而習
寄思齋藏稿

復夜而計過無憾而後卽安未聞終夜不寢也人精神
止有此數心有餘閑靈妙乃生勞神太過必致疾病非
保身事親之道也又學貴淹通名物象數誠宜博涉以
足下現在所得已足壓倒流輩然科名所決尙不在此
觀古今博雅能著書傳世之人其得力多在科第已成
後足下且壹意揣摩應試之文以取科第務期必得餘
姑置爲後圖可也叨在世好且承足下虛懷故敢率其
慙直庶效芻蕘之一得唯足下畱意

覆蔣伯生書

兩辱賜書詞致淹雅駢體中古音鏗然義山瑰麗子山
新奇兼有其勝并蒙寄和拙詩采旣鮮華神復超逸纏
綿之意溢於翰毫清越琳珪殆無以喻所謂聽陽春之
高曲形巴里之下音者雜誦再三曷勝愧服前經貴治
過叨款曲方虞煩累主人不意時踰境遷尙勞記注倦
倦若此感戢豈言可罄足下服政清勤循而兼能非曲
徇人意者以弟所見山左州縣中自李鄒平文耕杜昌
邑蕙外如兄者實不多見若果大吏賢明畱意人才薦

寄思齋藏稿

卷四書

八

刻可必然升沈有命惟盡分所宜靜以聽之知足下素
位而行早契斯言至於謹小慎微儒者之學切於今時
良非迂闊介茲竟挂彈章都中喧傳學使先具夾片撫
軍繼之福運使落職亦然其劾介茲云云此等事涉曖
昧不審何以得之古云戰戰慄慄日慎一日又曰不矜
細行終累大德居官之不可不慎也如是叨在知好聊
復及之賢郎雋才春闈大捷直上瀛洲可爲預賀茲因
風便奉答不具

祭

先師孔子文

於戲至高惟天至厚惟地道化彌綸不可思議大哉

孔子名言莫繫包貫三才師表萬世儀範帝王陶鈞賢
智化則難幾道無或異子臣弟友人倫之至顏瞻孟淑
卓立猶企矧伊末學得門徒覲少誦

聖言景行非易程遠尼山源遙洙泗幸奉

恩綸來東校試祇懼冰淵深虞隕墜喜近

聖居欣逢時祭敬薦馨香肅將祀事顛俊

寄思齋藏稿

卷四 祭文

九

帝心奇英臣志庶膈愚蒙有教無類瞻仰

官墻巍巍天際尙享

聖言景行非易程遠尼山源遙洙泗幸奉

恩綸來東校試祇懼冰淵深虞隕墜喜近

聖居欣逢時祭敬薦馨香肅將祀事顛俊

寄思齋藏稿

卷四 祭文

九

公祭叔孀張安人文

嗚呼吾家前輩凋零無幾二老幸存今喪一矣吁惟叔
毋德實女師精明勤儉大義克持逮事舅姑婉愉柔嘉
我太父母歡然獎誇襄我季父如賓之敬黃鵠中歌柏
舟矢詠茹蘖飲冰教成二子伯塤仲箴膠庠聲起鞞鞞
雙華一柎忽落萱憂難忘蘭蔭猶託舍頤願遂鳩杖神
清孫枝挺立庶振家聲猶子登朝實叨撫愛述德請褒
袞章斯佩年臨大耋福履方綿鶴骨雖臞尙穩食眠獻
歲椒杯載瞻色笑不虞數日反賀以弔嗚呼昔者盛時
寄思齋藏稿

卷四 祭文

十

子姪森然起居環視稱觴奉年年來凋謝三分去一孀
也又亡悲愴胸臆人慙謝寶數備馬常孿涕陳哀昆季
偕行有酒盈樽有肉載俎知來嘗否嗚呼叔母

祭聞榮松姻兄文

嗚呼幻化冥冥斯理誰測孰意姻兄遽捐館宅感舊悲
來尋蹤世隔道直情長身閒命迫追惟戚誼想像平生
自吾髫歲識君弟兄君憐余樸許締姻盟數十年來歡
若筮筮盛事不常仲叔先喪唯君及季來相跌宕季也
鄉居覲面猶曠君家北城往來尤暢嗟余狷狹於俗寡
宜申申余詈曷不餽醢愛深似怒吾實君知逮聞正義
立見解頤嗚呼姻兄今罕其伍見卽偏隅胸無城府箴
余賤息疏狂屢忤比稍悔悛方圖過補命也如何泰山
寄思齋藏稿

卷四 祭文

十一

頽折維子與婿兩難面訣所幸子才高等前列受餼歸
來麻衣如雪弟子猶子禮有明文才能孝何憂後昆
古稀年近壽亦堪云逍遙乘化莊蝶爲羣惟我舊姻實
深眷戀月之初旬猶偕笑燕席角倚裳清尊一面何虞
數日遽聞凶變嗚呼有生必死賢聖皆然無疾坐逝君
庶幾焉薄奠芳醪聊當餞筵誰無聚散此別千年

敕祀昭忠祠署五郎關通判左公墓志銘

左公繡泉以嘉慶三年守城擊賊沒越廿六年道光癸未其孫德裕來京屬某銘其墓某於公癸卯同年與厥昆觀海相友善不敢辭嘉公以死勤事亦樂爲之志公諱觀瀾繡泉其字一字畫舫世居吉安永新宋以來代有偉人曾祖沛川祖紹源父曰玉藻母氏龍生子二長觀海官上思州知州次卽公繼母尹氏子一觀濤太學生公離襁褓而母卒五歲入塾性聰穎十一學爲文下筆驚長老弱冠補弟子員每歲科試與兄觀海迭冠其奇思齋藏稿

卷四墓志

十一

曹乾隆癸卯中副車丙午與兄同雋於鄉乙卯大挑以知縣試用陝西值教匪滋擾奉檄署西安府五郎關通判以地當川陝扼要賊必爭不可無城郭旣募鄉勇訓練卽牒大府願捐廉雇役築土城躬督版鋪民踴躍趨工半月竣事三日而賊至度不可攻宵遁公悉精銳啟城追之斬獲甚衆會撫軍遣千總某以兵駐關南二十里營山上請公悉調鄉勇赴營壯聲勢公從之數日賊突出別道薄城城守不滿百人公亟請千總赴援不至賊衆圍之數千守者兇懼公召子承蔭等勵之皆泣對

曰願從死乃分督兵勇乘城夜多然炬束老弱齊聲呼
譟賊不知虛實遂引去明日將軍德楞泰明亮至詢守
狀皆驚歎制軍撤千總別遣守備率兵駐城中聽公節
制於是城守益堅公時集民講約激以忠義衆咸樂爲
用嘉慶二年以勞資補安定知縣西安府啟撫軍曰五
郎關要地左令去賊必來撫軍悟立遣人止公始賊聞
公去果悉衆至見公立城上咸錯愕公遙語曰若輩迫
饑寒耳何遂爲賊今若歸順吾言於撫軍貸若死能殺
渠魁獻且得重賞賊相顧色動其渠亟揮衆退次日二

寄思齋藏稿

卷四

墓志

三

百餘人詣城降公納之守備曰詐也蓋今夜殲焉公以
殺降不祥且虛實未可知乃庭集二百餘人諭之曰若
等紿吾城應賊吾重失信故納汝并不汝殺今計安出
欲終從賊聽若歸皆稽首曰民等鄰農也公保此地民
如護嬰兒故鄰民決計歸命惟後至六人者從賊久不
知其降意公曰若曹自別之曰其裏衣有識乃各自解
衣六人者色變不敢解因擒斬之賊旋大至公投六首
城外賊大駭遁去後復以計誘殺賊數百三年秋賊首
阮正統王三槐焚掠秦中公日夜訓厲士卒昇大礮城

上十月廿五日賊逼城公督兵力禦手發礮礮轟若巨雷斃賊無算而公亦以礮裂傷顱負痛解所佩刀付長子承蔭勉以殺賊報國卽昇歸署召守備至屬以守事亟遣人間道請代勿令我子成服勿聲張益登陴嚴禦以疑賊不數日撫軍益兵當至賊去矣言訖卒守備如所戒後二日兵至賊果退承蔭遵遺命率鄉勇泣叩軍門願殺賊復讐制軍那彥成哀且壯之俾隨撫軍方維甸營連衝鋒敗賊四年十月十四日躡賊沙溝口與賊渠徐添德遇轉戰力竭陣沒沒時猶手父佩刀不可拔

寄思齋藏稿

卷四 墓志

西

事聞議卹加級 贈公如陣亡例 贈承蔭雲騎尉竝入祀昭忠祠又給長孫德裕雲騎尉世職公至性過人事父及繼母俱以孝稱與昆季悌友備至在官時民有兄弟爭財者公旣訓飭之適兄上思州書至有云季弟來署而吾與弟遙隔數千里風雨聯牀何時踐約并引坡公世世爲兄弟之句公捧書泣下付訟者兄弟令閱訟者感悔泣謝去其以德導民類如是生於乾隆庚午六月初十日至卒時年五十配周氏子四長承蔭次承芳其次承茂承芝俱出繼孫男八以其年月日葬某承

陰耐焉銘曰

南潭義嗣左鼎裔孫家承孝友才備武文關扼五郎川
陝之門崇墉肇立勁旅新屯障比睢陽勇竝崑軍長鯨
屢翦封豕狂奔礮轟手發鐵炸顛捫命垂呼吸策畫煩
煩虎牙馳召霽雲待援桓桓令嗣泣籲帥轅願先士卒
誓雪讐冤子殉父難臣報君恩忠貞下壺激烈平原偉
矣先生義薄天雲科名無愧史冊留芬

聖朝卹蔭祀典常存峩峩豐碑鬱鬱高墳永安毅魄垂
裕後昆

寄思齋藏稿

卷四墓志

五

常德府知府鄭公墓志銘

袁州有賢守曰鄭公政務教化而不以姑息博民譽故
善良胥安其頑梗者或陰受福而不知迨其去也久益
見思卽向之陰受其福者亦回謗而爲頌嗚呼此其入
民豈淺哉今鄭公謝常德事沒三年矣其孤世倌以狀
走京師乞銘其墓某袁民也悉公循績其政以不華辭
按狀公諱鵬程字登衢別字松谷先世由福清遷閩縣
曾祖朝宗祖廷相父太學生楠竝以公貴 贈封朝議
大夫毋何恭人通書史著疎影軒詩集當封翁時家中

落常出外治生公幼隨母讀穎異不逐羣兒嬉偶爲紙
鳶戲母怒視之有五言絕句斐然成章聞者器焉弱冠
以縣案首入泮乾隆甲寅舉於鄉嘉慶丙辰進士官戶
部雲南司主事勤於其職成親王掌部務賢之俾司捐
納房升江南司員外郎與脩會典則例監督寶泉局稽
察鹽茶引總辦井田科現審處竝著勤能有爭田獄百
餘年株繫多死公勾稽核訊罪疑者減釋案遂結州縣
賦多積逋議者欲增重處分公持不可曰處分嚴則催
科急吏役得肆奸虐且歲歉民艱食豈忍聽追呼議遂

寄思齋藏稿

卷四墓志

七

寢其執義不苛類如是升山東司郎中京察一等值江
西請員以知府發往初署臨江府有樟樹鎮商賈所集
舟車往來多劫案公設巡舟募邏卒輪夜偵緝盜風以
息尋實授袁州府袁與臨接壤莠民聞風斂跡抵袁首
興文教郡城昌黎書院明時因韓文公祠改建也百餘
年來漸墮壞郡學宮歷歲久將傾圮試院湫隘公集郡
人勸輸悉新之增書院橫舍膏火相學宮陰陽易其方
位拓考棚添廊號規制閎堅試院爲江西第一先是首
邑宜春闕進士七十餘年次歲卽有聯捷者咸謂公興

學之效云萬載土棚爭考歷百餘年歲科試輒攻訐漸
至阻考勢張甚公曉以禍福不解乃詳大府請分額順
輿情而懲其阻考之魁後卒如所請土客以安當夫獄
有所歸蚩蚩者或不知感而化大爲小公之用心苦矣
事定後乃復思之分宜有山曰展石嶺自康熙年鍾林
兩姓相爭殺公親勘判左歸鍾右歸林以其中歸官兩
造悅服其試士最精核當汪公廷珍視學時閱文公嚴
郡縣榜首多被黜獨公所取皆進進多府榜前列其審
案虛衷研鞫不輕用刑亦不爲小惠往往小懲大戒愛

寄思齋藏稿

卷四墓志

七

惜士類有敗行必多方教誠導以自新多改悔者性剛
正不迎合上官有屬縣朦詳被揭乃妄訐公對簿金陵
至者睚眦恫喝意不測公據理侃侃直辨卒不能屈尋
以外艱去任袁人沿道餞送不絕歸里宦橐蕭然襤被
舊書而已服闋補湖南常德爲政一如在吾袁時中間
勘湖地定經界議疏築以息坍漲之爭誅首惡以清湖
面之盜建清節堂以卹窮瘡械治奸民夏光先以快人
心皆實惠及民者治常六載三護岳常澧道屢決大疑
案已卯因公被議大府以廉勤可靠奏准捐復畱楚旋

疾作假歸甫一年卒於籍嗚呼公心存濟物才足以遂其志願未獲大展其用僅效於一二郡良爲可惜然循績昭然口碑不衰亦可謂所居民樂所去民思者矣視彼居顯位而泯然無聞者何如也其孝友出天性兒時術者推母某年當死輒憂泣祈以身代幼苦貧自塾歸何太恭人常減己飯飼公而自覆杯飯底以盈之公察知悲泣自是每飯必俟母膳畢而後食比得官太恭人久沒迎養封翁郡署竭誠盡敬旋里時迎弟復同居親愛逾舊從弟彬試禮闈道卒爲營其身後撫其孤極周寄思齋藏稿

卷四 墓志

六

性者學公餘旅暇輒讀書著有聊以補拙齋集若干卷嗚呼君孝友著於家庭施於官政發爲文章其可傳也已生乾隆壬辰月日以道光辛巳月日卒享年五十配裴氏 封恭人子六長世倌舉人次世祺監生次家祥次家玉出繼家韶殤次家熊以癸未月日葬某銘曰

天挺鼇峯是生正直學古淵淳居官悃悃澤國一麾清風五緘江右循聲漢南敏德武輯文脩藝安黍稷用未竟才道豐報奮鬱鬱佳城龍阡待勒嗚呼鄭公千秋此

宅

通政使司副使筆珊喬公墓志銘

筆珊喬君卒京師之八月將歸葬其鄉其孤用遴囑余文其藏某於君同年中最知厚敢不諾而銘諸君初名遠煥字賁山官顯後值禱雨奉

睿皇帝御筆改遠瑛遂字筆珊湖北孝感人也世居洪二里曾祖方岳祖士偉竝有令德父曰志行字訥庵乾隆乙酉舉人品學重鄉閭著有凝香書屋文稿三代皆以君貴 贈資政大夫曾祖妣張祖妣周母氏夏繼母氏胡竝 贈夫人兄弟三人長遠炳庶吉士今官刑部

寄思齋藏稿

卷四 墓志

九

郎中季某早卒君幼穎特有神童稱甫離乳夏太夫人教之識字口授唐詩百餘首皆能記誦六歲入塾訥庵贈公以從學者衆且家貧欲壹意督其長者令君習耕牧君私取案頭書集及古文選本流覽試詰之歷歷能背覆私學詩文出語驚人同學以告贈公始決意課讀十四應童試郡守蘇公拔榜首學使胡文恪公取入縣庠第一旋丁外艱人言贈公聞喜大笑而終云超等食餼戊申雋於鄉庚戌以二甲朝考入選用主事分戶部江南司兼山東司學習性敏慧鉤稽一切吏不能欺補

陝西司嘉慶戊午升貴州司員外郎明年晉陝西司郎中壬戌擢山東道御史君入臺後自以職司耳目雖奉查倉巡城之任未足盡言責銳意建言前後條陳甚多如言濟漕務也則請清查私典屯田贖歸運丁言悞支軍需處分也則請各按銀數定重輕言賠款宜分別也則請萬兩以上量緩追限又以贓罰庫案久未成讞請議處刑部堂司各官皆奉

旨允行甲子丁繼母憂服闋補福建道御史擢刑科給事中疏言戶部冒領庫銀要犯萬青請通緝又請

寄思齋藏稿

卷四

墓志

二十

勅督撫嚴飭州縣速結訟案捕要犯竝

允行劾湖北臬司周某劣款署鍾祥縣黃某相驗騷擾濫責庠衿周旋奪職遣戍黃降四級調用聞者快之其未准行者如山東運使崇某改御史郎中它重聽年衰者請勿爲例又請以陳良從祀 聖廟皆有關政典壬申巡視西城轉掌戶科尋擢內閣侍讀學士晉太僕寺少卿值林清之亂疏請宣揚教化以正人心有

旨宣行道光壬午轉通政使司副使體素充腴食量過人以目翳過服涼劑驟消滅今歲夏初遵疾遂卒君自

服官後凡三與文衡嘉慶戊午典四川鄉試庚申戊辰
分校北闈取薦多知名士今夏奉

命視奉天學病不克行識者惜之爲人謙退溫厚處事
安詳間有齟齬必婉商人咸樂與共事尤篤於倫常少
失恃怙事繼母如所生與兄遠炳友愛白首無閒兒子
用遷成進士多其助成爲文有氣魄而曲盡情理無微
不入如長江大河滔滔千里隨科坎皆盈也詩清麗工
對偶有奇氣惜多散佚僅存詩三卷賦一卷今古文各
二卷嗚呼君學行著鄉里信僚友身歷三朝服官勤恪

寄思齋藏稿

卷四

墓志

三

奏議裨國是益民生可不朽也已生乾隆辛巳月日沒

道光癸未月日配張氏夫人子一蔭生候補州吏目以

某年月葬某銘曰荆山挺秀漢水鍾英橋公之胄世載

賢聲篤生茂德體碩神清外涵溫潤內鑿精明雄文冠

郡稗齒騰名春官才拔農部政成効忠言路馳譽文衡

冰霜臺肅桃李門盈宏羅國俊廣益民生京堂妙選

宸簡增榮三旬綸閣十載罔卿怡怡兄弟奕奕簪纓天

懷夷曠世味澹營方司龍納遽赴鶴迎新阡冬樹宿草

春萌垂床哲嗣永奠佳城

家質孚先生墓志銘

質孚先生於某爲族父行常厚遇某至略年輩以字相尊稱旣同官京師先後旋里來往親密每宴必同席甚相得也自李厚岡家晚堂諸老宿辭世數以文事推仲兄淑郵姪敬堂獎借及某某入都而淑郵敬堂相繼沒先生又辭世追維平昔知好不能已於言謹爲志其墓先生諱文彬字程材質孚其別字世居萬載集賢坊太父樸庵邑附生父裕齋職員竝以先生貴 贈文林郎母周太孺人生母唐太孺人初裕齋公艱於嗣舉先生

寄思齋藏稿

卷四 墓志

三

時年五十四矣以得子晚頗姑息唐太孺人課之讀甚勤積鍼術所得助購書費先生幼聰敏惇慤因是感奮愈力學旋補邑諸生食餼有聲乾隆戊子舉於鄉報至裕齋公已下世數日先生以親弗及見也語及輒泣然旣數上公車薦不售母唐太孺人老骨湊間時隱痛先生躬率子女按摩稍差因壹意侍養不欲離庾子母促之北上始就禮闈旋聞訃亟僦小車走數千里足重繭哀毀骨立丁未挑發四川知縣以安詳悃悞爲廉使陳公奉茲器重有粹然儒者之目厯署塾江鹽亭皆有聲

大憲保公過鹽亭聞而獎之補丹棱丹棱缺最瘠多命盜案有退役史英者盜魁也黠且鷙事發輒逃匿其黨庇之莫敢捕先生抵任嚴賞罰設方法督役往捕敢拒卽格殺得勿論役如誠夜遇英拒傷數役憤起立鬪死英搜緝餘黨盜風以息諸服毒自經者聞報卽往驗驗非毆傷立命瘞非威逼及它故立省釋輕生俗亦息廓爾喀用兵所過例派夫馬先生通計費若干酌章程榜衢市令公正紳士董之不假手胥役民踴躍縣故隸眉州州守派未善也州民至揭丹棱榜控大府大府

寄思齋藏稿

卷四

墓志

三

飭州倣先生法民始安焉旋調理巴塘所經理人皆信服兩宣撫司甥舅也以爭坐位結怨先納印及紅頂花翎於官將構兵先生嚴檄禁之且召至開誠諭解皆感泣斂頭和好如初巴塘人尤德之比仄代灑涕相送者百餘里不絕旋委署大足兼署直隸邛州凡官蜀十八年所至事皆辦上司未嘗提一案云嘉慶己未由邊倅擢雲南賓川知州改戶部福建司主事司員旣衆自循分外無可見才同事多輕雋少年喜詼諧先生自顧齒宿不樂與追逐輒引疾堂官畱之不可遂歸歸時年甫

六旬其恬退如是性平易近人人樂與親雖悍夫亦聞
言自化居官所得俸時分戚友歸時囊甚澀至鬻田支
歲用其寬厚廉潔如是某初官御史銳意建言先生誠
以勿亟謂敢言非難言而當爲難某常佩服斯語云旣
里居以獎進後學爲務屢主講龍河書院郭氏義塾陶
成甚衆族人推爲宗長辭以主修族譜請始就因詳立
義田規積穀爲賑荒及資送試者費族人善之生平自
文翰書籍外無它者所著詩稿已梓行嗚呼以先生德
足化人才足御紛使當方面大任龔黃之績不難復見

寄思齋藏稿

卷四 墓志

一

顧僅效於巴塘蜀邑與族黨里塾間亦可慨已然礪其
涯略亦足令過者覽而起敬焉先生以乾隆某年月日
生嘉慶某年月日卒年七十有三葬石筍阡元配繼配
俱張孺人子七元辰貢生元颺邑附生前卒元翰元超
前卒元福元滙業儒元采殤孫八曾孫四銘曰

邦之彥族之儁廉可爲貧非病家雖瘠民則潤其神腴
其道勝澤在蜀羞懷恩信寬仁恬澹物無競今之耇成
昔先正嶙嶙石筍端且勁鬱鬱佳城此其鎮天豐才德
而用弗竟曰畱以胙其子姓

巢滙堂先生傳

滙堂先生諱啟畬字有源某童時受業師也家世以文學鳴父曰靜庵公爲邑廩生有聲先生持躬方正而與人坦易學深博尤善宋儒家言爲文探根躡窟深入理奧出以平正無險仄態不違古亦不戾時爲諸生試輒冠曹從游者甚衆乾隆癸酉以拔萃貢成均某科鄉闈房官以元薦主司疑而置之壬午中副榜弟子益進初設教浣花書塾有貧不能具束脩者反助之資勉以成業先後縣尹重其名數敦請主講書院凡十餘年家仲

寄思齋藏稿

卷四傳

五

兄淑郵嘗往肄業使某附課癸巳設帳舅氏省心軒某始得從事焉時某甫以幼童入泮爲文率天機不甚諳紀律講章說尤憚披覽先生裁以理法所以勸勵之甚至惜其時不能細領也其說四子書掩卷莊誦聲鏗然與書理節族相中而反覆曉暢無義不宣間引古今事實及邑中方言諺語相證明或雜以詼諧聞者無不解頤立悟雖嗜嬾如某亦肅聽忘倦故邑人說書推先生爲最性喜種花館前夾道爲畦列蒔四時名卉手自澆灌花時爛若錦繡族叔明經崇勳其高弟也得先生種

菊法菊遂甲一邑云又精烹調學徒每得異味先生必
令庖人謹火候躬調鹽梅饌出味果勝絕嘗曰味須鹹
淡適宜又須在酸鹹之外爲文亦如是生平非公不履
公門至於朋好間詩壇酒壘輒酣嬉淋漓跌宕不能止
性善飲終席溫克顧苦胛風亦不甚介意嘗九日偕諸
徒登鷺鼻峯至半嶺迴眺清曠游詠方暢恙忽發羣掖
以下抵館少差輒引觴縱飲命諸徒藏鉤拇戰盡歡乃
已其曠達如此乙未先生一館於宜春後不復出丁酉
赴鄉闈文場失利尋病卒遠近門生致祭奠者百餘人

寄思齋藏稿

卷四傳

美

觀者稱盛某自慙學植疏蕪於先生之業未能傳其萬
一也憶家仲兄拔貢時先生來賀某恭送至門顧某曰
勉之以解元望子矣某皇然甚愧今雖未能勉副先生
言幸得忝科名厯官吏館諫垣仲兄淑郵亦以成進士
得官而惜乎先生未及見也適其族修家譜因敬述向
所親炙及所知者爲傳以志無忘其它家傳自詳不復
贅云

鄧與齋孝廉傳

君諱斯沂字浴儒與齋其別字也世爲邑名諸生父諱
鐫太學生長厚最鄉里君幼而沈粹穎敏過人授以經
書輒有悟十歲從郭明經秉銓學爲文出筆雋雅郭大
器之弱冠以郡試榜首列弟子員尋偕家仲氏淑郵游
厚岡李先生門竝稱高足當淑郵與某人泮時君文名
已噪歲科試屢超等已而淑郵拔貢太學君舉優行廩
餼邑子弟從君游者甚衆君年旣長余名亦較余著甚
然君不以後進視余也每見輒傾倒相與暢談竟日或

寄思齋藏稿

卷四

毛

出文藝互商間有指摘余悅君君亦不余怪也君旣與
淑郵聯姻兼友誼相得每鄉試僦舟赴省租寓必與余
兄弟偕余兄弟亦非君不樂君善文而精衡鑒方癸卯
試畢同居及邑人過寓必令自誦其闡文意皆不甚許
可獨激賞余作謂淑郵曰兄文固高不如弟捷之速也
是科吾邑惟某倖雋咸謂君決科不爽云然君竟久困
諸生中至乾隆甲寅始舉於鄉乙卯畱京刻自揣摩數
以文屬余直評余慮其過苦勸少休而君所居郡邸西
上房狹而熱所服丸多補劑不宜於暑邸中寓人頗雜

或呼盧竟日君不能耐乃夜讀達旦鄙人多笑之所隨
僕以不諧衆遣去君益鬱鬱不自得語郡人曰我若寓
辛宅明年必雋今休矣鄙人爲余言且以爲癩余始不
之信察之良然乃迎入舍與余姪敬堂同廳居敬堂知
醫屬爲藥之君亦不甚肯服也居半年癩不已然當發
時聞余言一道破輒爽然止常喃喃自誦其文謂余曰
前蒙所批某篇某股今自改矣諦聽之實較精警超脫
然自文外其它語皆不可曉矣蓋性之所好業之所精
雖癩不迷如此適淑郵以公車人都見其狀曰噫浴儒

寄思齋藏稿

卷四傳

天

信癩矣亟寓書其家厥弟秀濤來迎以歸歸二年醫治
不效竟卒邑人惜之君性孝友弟六人皆從君讀一入
泮餘皆彬雅能自立太學公年旣老不欲久理家政命
析箸君意不樂弟偶闕乏輒引爲已憂或代爲借償不
令知也有戚某負君百金或勸控追不可竟還其券讀
書大唐寺見饜夫私泣詢知債家所逼將鬻妻君邀同
志代償保全之有聘其婢者願出多金君告以此婢蠢
愚祇取原價遣焉其尙義疏財類如是性恬淡得失不
介懷待物甚寬厚然遇同輩遭陵侮輒義形於色己亥

科試畢將還挑夫十餘索直昂比另僱則前十餘人者脅制之勢洶洶行李不得發同寓皆束手無如何君奮起立擒其渠渠見君魁梧雄傑愕不敢動遂烏獸散君鄉薦房師爲卞坦綸先生謁時偉君貌蓋喜謂才不虛生必能爲國家出力不虞一上公車遽病廢以卒也嗚呼以君天畀之厚文行之美皆宜大用於世乃蚤歲盛名年近艾齒始一登賢書而又不竟其才良爲可惜意者天胙善人不於其身於其後固將以有待耶子五人一曰可廷余兄淑郵女壻孫朝颺可廷子文庠有聲

寄思齋藏稿

卷四傳

五

劉恬齋明經傳

吾友恬齋沒之十二年孤廷杰等以狀來乞余傳余與恬齋交最稔知恬齋最深其敢辭君初名鳴皋字鶴和後改時耕字學禾一字恬齋考雲臺先生以懋遷勤儉起家母氏楊有子六君其季也少負奇氣倜儻有大節壯乃肆志於學爲文雄快俊偉不蹈恒谿稱其爲人太守馬公試士甚器之取冠軍入泮歲科試皆高等壬子鄉闈薦未售君陰念得失有數不可強而諸昆相繼去世羣從幼弱家事無可誘遂弃舉業援例貢成均壹意

理家政撫子姪皆成立今江口諸劉多席先業擁厚賞
詩禮雍然兼慷慨好賓客君之力也君勇於爲義乾隆
甲寅乙卯間郡守張君五緯飭屬建育嬰堂君首倡同
志捐貲置田以成之邑向無考棚士子自攜几榻出入
艱劬君偕邑中紳耆呈縣創建襄貲董其役規制煥然
試者便之其後郡人改建試院君命姪步雲獨建一棚
而躬詣郡經理工以完固邑歲祲米價踴貴民情洵洵
君倡議聚公米平糶出貲勸輸事遂集邑賴以安其它
料道成梁惜字惜牛諸義舉君無不與事亦非君不辦

寄思齋藏稿

卷四 傳

三

也君軀幹脩偉美鬚髯目炯炯有光重然諾喜排難解
紛視人事如已事戚友皆倚重之顧胸次朗然非禮之
禮非義之義斷不肯爲人有惑者立勸止之嫌怨不避
故人益重君始余識君竹溪書院喜君語言俊爽訂交
焉余官京師告養歸假館課生徒君命子一恕從余游
前後幾十年朝夕過從歡甚比余入都補官而君以長
逝聞矣嗚呼君始當父兄繼逝之餘子姪百餘人以一
身支持門戶卒能使一家競爽羣從和睦外侮不生義
舉屢興其才有過人者晚年閱世益深見道益熟意氣

日益和平顧雄才大略不獲大用於時僅著於家庭鄉里間爲可惜也已嘉慶乙亥正月卒年六十有八以子廷杰官封登仕郎福建貓霧司巡檢

寄思齋藏稿

卷四傳

三

劉耐村先生傳

先生諱大成字先已一字耐村瑞州新昌人也代有偉人父曰校芳篤雅稱庠序母氏熊知書能文先生生而穎異甫能言母授以孝經四子書輒成誦比就傅愈勤學夜則侍父母聽講解不倦父嘗命督耕則挾冊誦田間九歲母卒哀毀過成人事繼母熊曲得其歡父邁危疾以身代禱尋愈及父卒毀幾滅性教育諸弟悉周摯有同母弟三歲失母攜其食寢十餘年後弟卒遺三女養嫁之如所生幼有文名爲諸生噪甚辛丑成進士適

截選屆期以母老不忍離母諷以祿養始就選授湖北竹山知縣甫下車訴牒百餘逐一剖決開導民感悟多不願終訟者居官儉約所需一不累民民甚安之竹山古上庸地僻居萬山中界川陝最易藏奸明季爲流寇出沒巢穴先生力行保甲甫月餘值枝宜教匪猖獗襄鄖所轄奸黨潛結城守者悉戒嚴竹山故無城雖設專營駐防因勦苗匪調去畱者僅百名先生捐廉募鄉勇製軍器掘濠編柵事未集適偵役捕得匪黨十餘鞠之有約期搶據竹山語卽飛牘告急集僚屬謀曰吾守具

寄思齋藏稿

卷四傳

三

未完爲賊乘必困與坐以待困不如出據險要相機堵禦皆曰然方派撥聞賊已據保康與接壤先生乃以典史吳國華守縣治守備孫掄魁別守隘所以武陽堡界保康親率衆當其衝納縣印於懷語弟大燄曰吾守此土與存與亡分也倉卒未能迎養心常耿耿汝速歸善事老母爲我謝母兒此生不能再侍膝下矣無它囑旋據險設伏遴健足偵探終夜無少休而賊已越後嶺入縣焚掠矣國華不能支與掄魁先後至武陽先生率之赴勦道遇賊鎗斃其匪十數賊來益衆遂潰退保武陽

孫與吳議請援先生曰邑已失待援需時何益吾死此
決矣孫吳出點兵勇不滿百漏已三下親信梅蘭馨者
獨侍側令出探隘口比反先生已肅衣冠佩印綬北向
自經矣孫吳踵至愕然亦殉焉時嘉慶元年二月二十
二日也年六十七事聞得

旨褒卹贈知州銜給恩騎尉世職及祭葬銀建昭忠祠
於本郡始先生以名諸生孝友恂恂文章著鄉閭及登
黃甲宰巖邑莅事未百日不獲竟其用然臨大節就義
從容卒膺

寄思齋藏稿

卷四傳

三

國恩榮列祀典爲科名增重於戲可謂完人也已余識
先生晚當之官竹山時餞之京邸聽其言藹然仁者閱
一年而聞其以死事獲旌旣喜忠烈之克昭而悲其
遽逝又幸生平之得親炙其人也故爲之傳子三人竝
文而賢曰璧者庚午副舉與余善

外舅聞仲甫公傳

外舅聞公諱之琪字虞階號仲甫梅溪先生次子也余甫應試則久聞公名在童子試中藉甚當是時余年十一公已三十餘矣稍長得親炙公知其文與行大概而乃爲公扼腕益甚公性恬曠不滯於物而甚敦門內行幼失恃友愛其弟兄未嘗頃步離長益加摯遂得其太母與梅溪先生歡好讀書不屑屑章句取大意而已然記性甚敏自六經左傳戰國太史公書旁及莊列九流下逮虞初齊諧之屬靡所不涉過目輒能撮其奇警

寄思齋藏稿

卷四傳

壽

與人縱橫辨論浩如也或賓從高會稽經誦史公忽出片語一坐盡傾間出遺文逸事相抵掌客無不掀髯噴飯或斂袂飲泣公故詼諧陳述又出人意表其謂其胸中多奇不可測也及久乃覺之則一一皆古書傳記所有人以是尤奇之性不好時文間一爲之穿穴囚鎖孤行側出無一語寄人離下然奧趣味之而愈出也名藝中少所推服獨喜杜登善先生安雅集選嘗語余曰此真才子作俗輩口中腥濃未乾弋獲科名易與耳必欲跳盪心靈沈湎薌澤舍是無以文爲也其孤詣絕俗如

是暇輒爲韻語時多雋永都散軼無可收拾嘗記其晚
春一絕有云二十四番花信了郊原猶自有桐花邑先
生李厚岡亟賞之生平不妄交而友誼最篤有急恒躬
爲稱貸不能償輒代償之其它通財周急之事尤多嘗
自以急故抵負者家負者出蹙額以應備言困狀公憫
然曰子無然吾今釋若負負者因出酒相爲歡公欣然
盡醉而返家人頗謂之不顧也然以是故卒無有償公
者家爲之稍落云公旣屢出就縣府試而輒冠其曹而
屢不得志於學使者無如何遂鬱鬱羞與後進伍則益
寄思齋藏稿

卷四傳

五

自放於酒人賓至必命觴觴必引滿大醉往往從深村
古寺與其田夫及寺之長老飲飲輒窮日夜竟以是得
酒病遂卒年三十九

宋應占像贊

司背之居廣平之裔有美士焉額廣而頤豐心平而色
霽曲直分人方圓應世世與之游而莫窺其際蓋矚然
若蓮之不染汎乎若舟之不繫也五子英英竝秀且慧
納之書城躬課其藝金籀非寶書田無稅坐圓光中得
最上計誰歟寫真叅斯妙諦點秋花於晚節發書香於
髫歲展斯圖也殆將壓庶子之春華媲燕山之芳桂歟
吾聞君司學事勤敏而精細慎斯以往以通於教子弟
行將有大小宋之科名以光乎門第

寄思齋藏稿

卷四贊

美

袁明錫夫婦像贊

緊高士之雲初擅袁山之清淑鮮兄弟於季虔同幼孤
於永叔譬嶧嶺之華桐若泰山之勁竹獨懋志於創垂
裕始基於田屋既手致夫殷康乃心勤於媿睦里人有
三老乞言之思縣令有一鄉善士之目天用錫以遐齡
人更誇其後福二龍竝譽許淵雙桂爭芳實族庠門列
其佩衿壁沼榮其冠服躬處泰以彌謙神含愉而帶肅
噫後之人觀奕葉之昌蕃願無忘前人之詒穀

古稱孟光是嬾梁鴻斂荆裙布甘守素風齊眉舉案克

展敬容方之孺人德亦從同若積勤以致阜轉約以爲
豐承宗事於椿萱失蔭之後相夫子於拮据捭茶之中
樂羊之機刀不斷敬姜之筐縷常充日添綫而紡促夜
篝燈以裳縫遂致田園大啟資用不窮年踰八十九十
曰耄子與元方季方比隆雖古之梁孟殆未足與爭雄
也噫彼逃名而偕隱此創業而襄功求壺範者盍師此
敏德與劬躬

仁山和尚像贊

四大皆空一絲不挂我相本無又焉用畫佛經云不可

寄思齋藏稿

卷四贊

七

以色身見如來不可以法身見如來行樂之圖胡爲來
哉是真圓覺請加轉語上人靜聽素珠停撫調相本無
胡有相名謂相實有誰爲相主執相義固非離相理亦
沮離卽之間義各有取對菩薩言是爲投體皈依之相
對弟子言是爲現身說法之相對世人言是爲大衆瞻
仰之相卽空見色真我非汝蠡洲之濱風神之字衣鉢
託茲晨鐘暮鼓暫爲壽者相永作開山祖成道它年象
教自古法座莊嚴緇徒拜睹不生不滅真如在此身不
可畱相焉用去世尊無言拈花笑語

施克振行略贊

古稱大宗今不其然產均著析適無敢專亦有家督綜
理罔愆萃極而渙門各異煙幾見鍾郝同居永年美矣
先生居長獨賢諸父昆弟家政俾肩力持門戶增益園
田提攜寡弱慰彼九泉周恤里黨吉後凶先擬師公藝
九世居延情殊勢阻抑志從權荆花早謝芹采遲攀高
懷鬱鬱揮手塵緣懿彼淑範勁節松堅撫孤代養不負
所天奕世承德食報方綿載揚芳躅家乘同編

寄思齋藏稿

卷四贊

三

郡教授章雲門同年壽序

天下士治則民治國家於守令外特立郡縣學官以教
士意良重也縣學所教不過其縣之人唯郡學萃數縣
之雋額廣而情通於諸縣易爲聯絡誠得一博雅敦重
之儒師表其間於以廣教化美風俗也尤便年友袁郡
司訓雲門章先生庶幾其人乎袁所轄凡四縣惟宜春
分宜風氣相近而萍鄉則近湘潭萬載則近筠州其性
情好尙剛柔秀樸因其風土弗能齊也自先生蒞學而
四縣人士翕然推服既喜其學之優又稱其行之美豈

無因而致歟先生全城望族家不逮中人而慷慨好施與幼力於學未弱冠名噪庠序間既長學益富一時名士多從之游若彭太史石芝熊進士東川吳孝廉鹿柴其社友也有百秋詩梓行傳誦至南越乾隆癸卯與余同登賢書甲辰禮闈僥得而失乙卯大挑得今職諸同人以先生長才遠志竟艱一第又不獲膺民社一展驥足而屈就冷官相與惜之先生曰不然古之學道者出則施諸政退則教於鄉況吾以官爲教教行道亦行也乃自顏其齋曰知味題其楹曰藏拙此居官閑可讀書寄思齋藏稿

卷四 壽序

无

靜可養性酬知惟課士窮則立品達則匡時蓋卽是而先生所養可知已初署崇義教諭諄諄以經學品行造士有庠生負官帑觸太守怒將詳革爲緩頰營救得解崇義人至今頌之其教授袁州一如在崇義時然則四縣人士所以推服罔間蓋有自來而先生所以課士酬知者豈虛語乎茲值壽躋古稀四邑之士相與製錦稱觴而屬余以序余聞之易曰樂天知命故不憂荀子曰樂易常壽今先生居官隨分自盡不以崇卑冷熱動心合於樂天之旨其多壽固宜且其蕃祉老壽萃於一門

勅命之錫榮逮雙親章服迎養樂莫大焉天所以胙先生蓋不俟乎鱸堂之慶矣抑余有頌焉曾南豐道院賦序云江西俗以終訟爲能而徐升以爲袁筠健訟有珥筆之號今四縣人雖師儒教澤涵被已久而風氣所囿積習相沿果能大異於古所云乎夫黨同以爲公誣善以爲智躍治以爲勇士風之薄教職之羞也修德業尙賢良明體達用冀爲朝廷宣力而不與鄉曲爭尺寸人才之盛教職之榮也先生旣學官領袖文行又爲四邑推服倘益脩其教焉將來善氣薰蒸必有以陶鎔一郡之士而歸於淳厚者蓋仰體聖天子興學作人之意以登民仁壽實在於此卽先生所以永受遐福亦在於此然非先生莫受余斯言也請以是爲侑爵

寄思齋藏稿

卷四 壽序

四

郭位南壽序

漢孔文舉云坐上客常滿尊中酒不空吾無憂矣後世以爲佳話夫惜費崇儉爲子孫計恒情也昔疏廣歸鄉里日令家供具設酒食請族人故舊賓客而子孫慮其以飲食盡金屬廣愛信老人風以及時立產業是二人者竝曠達好客而文舉之子能聽其親所爲不以惜金置產相風諫其識度過疏氏子遠矣孟子云養口體不如養志夫躬無寸長以自樹立藉親蔭惜費利私而使親不得遂其志是皆子之不才卽亦非親之福也今若

寄思齋藏稿

卷四 壽序

望

位堂郭先生其全福矣乎先生城中巨族先世及昆季子姪登賢書官通顯列庠矜者踵起然未嘗以門閥驕人爲人內精明有智略而謙和好賓客於文士尤加禮至其家者必苦留數四召諸子姪陪侍具珍肴豐膳絜尊親勸酬竟日盡歡乃已性善飲終席溫克不見醉容勸客旣殷重違其意往往大醉以去少英果有能文聲旣游庠聲益著晚得目肯乃移養家園益以賓燕自娛每燕客時立一僮執注司匕箸飲啖甚豪健客觴酌偶

淺輒察知弗能隱也諸客藏鬪射覆經其授意立中或

辨難勅敵鋒起先生從容一語調停詆諧敏妙四坐無
不解頤傾倒其風趣俊逸如此而其令嗣枚臣載勲諸
昆季左右就養一切先意承志曲得其歡心先生之愛
客也治具一無所倏而禮客意甚周載勲又善庖品味
皆出其手芳腴精潔先生以是益歡鬯怡然忘老蓋諸
嗣君賢而才善治生故家日益起而用不匱枚臣近兼
理祠事爲族人信重令長孫桂章篤雅好學餘俱成立
先生所以得泰然與賓客歡燕者由有賢後人也以視
疏廣有子而才識中下不足快其志者福不更勝哉昔

寄思齋藏稿

卷四 壽序

望

六國時瞽者竇公以鼓琴調攝至漢文朝年百八十歲
先生兼疏孔之曠達蕭灑恬適得琴之意而又有賢後
人以暢其天吾聞樂易者長壽竇公之年豈得專美於
前乎歲子月先生暨孺人雙壽之辰諸戚友以余嘗同
客其家也屬爲言以壽余惟是月冬至於周爲春發生
長羸皆根於是得春氣者恒溫厚福亦如之詩曰爲此
春酒以介眉壽正在此時先生旣豪飲諸嗣君雅知其
意食饗不爲概諸客不遺餘量必且如子建所云傾東
海之波爲酒競起以觴先生先生能無滿斟大斗如昔

觴客之嚴乎抑將向孟光之案而乞助飲乎夫飲無算爵祝無量壽亦賓客雅意也先生其無辭謹書此以侑爵

寄思齋藏稿

卷四 壽序

三

袁宥堂學博壽序

鄉先生鄉之表率也其仕宦遠方者言行罕與里中接惟解組閑居及以故需次於鄉則表率之責歸焉某少時則聞宜春袁宥堂先生名蓋仲兄淑郵嘗與同學昌黎書院就盧介軒太守試俱拔前茅族叔質夫民部嘗同寓京邸相友善俱爲余稱道其賢今年先生之甥鄧庸行從余游因益詳先生事先生橫塘著族門第甲於郡中積學有聲以府試冠軍入泮試輒冠其曹乾隆辛卯領鄉薦家清貧友教四方俊髦多所造就丁未以大

挑入等授教職歷五任俱爲士子推服其家居不履城
市不與公事元配某氏有賢德辭世廿八載不再娶論
者義之余又嘗從黃圃彭氏書塾花軒得讀所爲記文
翰之美概可想見足信爲品學兼優人也夫以先生之
文行與其聲望固足式於其鄉鄉之人亦無不以鄉先
生之禮相敬者抑聞古人云狗俗則廢道守道則遺俗
當鄉里無事時衽席豆觴虛相遜讓誠無可見鄉先生
之重一旦橫議羣興至倡爲非義之義躍冶跳梁相率
而陷於辟鄉先生倡明正義以力挽之則往往爲俗詬
寄思齋藏稿

卷四 壽序

器

病若依違中立和光同塵苟隨流俗之毀譽勢必入於
鄉愿以先生恬靜端方道氣足以勝必有以善處其閒
矣宜春士風較萬載向爲淳樸然風氣所趨安知今不
異於古先生耆年茂德願益以道表率之也抑先生方
需次補官將來內擢外升居官之日長安能與鄉人酬
酢乎及其未之官也吾尤望宜春諸君子酌斗加爵乞
言先生敬聆其教戒而無虛奉以鄉先生之名焉其可
也敢書此爲先生壽

施廷誥壽序

古之君子出則功施於世處則行孚於鄉隨其所遇各有責焉然出者動而多險處者靜而常安昔馬伏波勲高銅柱佩金紫而追憶從弟少游平生時語以爲士生一世鄉里稱善人於分已足彼豈薄功名輕富貴耶蓋躬履艱大之任動乎險中求如少游所志而不可得也若宜春施邦屏先生其審己之宜盡處之道而能以靜致福者乎先生簪纓之胄於昆弟四人中最少諸昆竝卓犖有才氣其叔兄某齋尤傑出喜排難解紛往往爲

寄思齋藏稿

卷四 壽序

壘

郡邑長所禮遇先生承父兄蔭溫溫無所試獨恬澹謹厚守繩尺諸昆咸謂福當勝已幼隨父任粵聰敏耆學無紈袴習氣比析炊年雖少經紀家政肅然有老成風與厥配勤儉相資日用以裕生平裹足公庭以城市喧囂卜築城南二十里中村居焉田園泉石之勝足以自適豈非少游所謂不求贏餘者耶其自奉儉約而延師課子無所恡尤喜市義鬻下田苦旱倡造筒車資漑者數百頃歲歉輒減佃民租緩其納期鄰里乞糴正斛外必加贈穀升斗之求開倉立應或竟蠲其值以故合鄉

感悅見耕牛就屠必贖而畜之家牛倒斃必潛瘞其仁
慈類如是豈非少游所謂鄉里稱善人者耶夫士無論
出處總期有濟於物昔王彥方管幼安淳于恭輩竝以
厚德雅量化其鄉人而今之士夫當伏處求田問舍外
任卹之義無聞既虧處靜之正其有慷慨倡公者則又
逞其鄉曲之見干名犯禁以悞人而自悞其貽害鄉里
滋甚此失之宜靜而反動本處常安之勢而相率以入
於險也於戲若先生者可以風矣先生少力學以體弱
不耐場屋援例入成均子國學縣庠竝有聲余與先生
寄思齋藏稿

卷四 壽序

吳

從子凌滄友善因得悉其行誼兼識諸嗣君蓋忠厚之
報固宜在芝蘭玉樹也今先生年躋古稀齊眉壽考四
世一堂桑梓榮之諸親友謀侑觴辭以屬余余謂先生
安常守靜善孚於鄉既有合於少游之語即使出仕於
時亦必能息事寧人身名俱泰況少游不以壽聞而先
生以杖國之年福履方興未艾勝少游遠甚惜乎某齋
先生未及見季弟今日之盛如伏波據鞍矍鑠時也然
以靜致福先生亦可颺然自信油然命爵矣謹序

黃傑老壽序

論衡云太平之世多長壽西陽雜俎云雲氣多壽荀子云樂易常壽之三者一需乎時一因乎地一存乎人得其一皆可以壽而弗能兼也待時地者不可必惟存乎人者於壽宜可以自致然或貧賤憂戚勞其神而搖其精雖欲勉爲樂易終屬矯情余觀田心黃傑翁先生其能以樂易之性而兼三壽者乎翁居末山之麓山故筠州望鎮扶輿磅礴細縕之氣蒸爲祥雲茁爲靈芝而田心適當其陽高原衍沃曠如奧如居人往往多富壽過寄思齋藏稿

卷四 壽序

七

其鄉者聞雞犬聲幾如劉安拔宅飛升時此壽之得於地者一矣身際

聖朝重熙累洽仁壽之澤徧於海溼山陬嘉慶元年

詔有司行引年典給冠帶穀綿其時翁適屆古稀榮邀恩錫雖司命添年之慶無以加茲壽之得乎時者二矣翁天懷浩蕩不脩飾邊幅與人交胸無城府人亦樂與之游家故不饒用或空乏不以動其心卒居積致殷阜中年田園所得甲於其鄉然尙樸素愛恬澹一如居約時教諸子若孫以耕讀桑麻之樂琴書之趣翛然自遠

不累於物不擾於境其天全焉見者目爲得養生訣故
年躋大耋貌如六十許人此壽之得於己者三矣夫一
邑之中被和食德自紳士至毗隸生齒無慮數萬然獲
以高年邀

恩賜曠典者不數數觀也卽巖棲谷隱得地氣之厚如
古所稱菊水三十家亦未必人盡黃鮐蓋雖當可以益
壽之時與地而克凝其麻者仍視乎其人然則翁所以
克兼三壽實樂易之自致而已今歲九月八十介眉之
辰翁之諸子及合孫茂才秀偕等將觴客爲壽翁曰無

寄思齋藏稿

卷四 壽序

哭

庸吾視生如傳舍乘化以游豈以壽始樂哉然吾健飲
啖若多置酒肉果我足矣何勞苦親友跋涉爲其曠達
眞樸與豐饒精神竝可想見適余館洋田羅氏羅君漢
章茂才翁姻也述其梗概屬爲序以壽之翁雖不欲煩
親友遠來祝祺而酌斗乞言冀邀福於翁飫翁珍肴脯
麩者興蓬勃而烏可以已珠履紛來翁其能徑自滿引
大嚼不爲諸坐客一開北海尊乎獨樂不若與人敢以
是爲翁侑

袁天山壽序

物之靜者莫如山山而峻極於天尤厚重巨鎮極天下之至靜者也能具靜德而與山同體則蕃祉老壽之應亦將有象乎山者焉宜春袁岳尚先生以天山自號觀其生平殆德不愧名者矣先生族子大梅從余游述先生行事甚詳其先世有厚德積勤儉致殷阜先生席業承舊規不事貨殖而家益裕如山之因其地產巖落實而取材焉其服食儉約戒子弟以謹守家風如山之蘊玉孕珠而善體坤輿之吝嗇焉其居家敦孝友嚴

寄思齋藏稿

卷四 壽序

兕

課子弟不合離書塾得敦良義端重寡言終日不出戶庭得良止義撫諸子姪困乏必周得地山謙衷多益寡之義非義非道一介不以取予有泰山巖巖氣象邑宰招飲必託故辭殆坡詩所云青山偃蹇尋常不肯入官府者歟其馭下以仁有僕竊藏逃老無所依自投而仍收養也所謂山藪藏疾者乎生平非法不言放言游手之徒望而避之非天山大象所謂遠小人不惡而嚴者歟其讀書喜默識務心得記典極博又山天大象所謂多識前言往行以畜其德者歟其作文刻苦不喜浮囂

有高山邃谷絕幽鑿險之致焉至於穀際荒年減價平糶鄰邑遠鄉咸得分潤記稱山林邱陵民取材用先生象焉宜邑之建考棚也擬捐金數百或言有司以名達子姪且入泮先生恥其邀利遽改助文昌宮其清高峻潔又如太華削成迴絕羣峯焉夫先生德既同山矣而其精神福澤乃遂與山相類嗣君森然五峯屹立次君三君竝以高才積學受知汪瑟庵先生補弟子員後賢濟美如名山之產珣玕竹箭寶藏竝興如丹山鳳雛九苞采耀值急公例開諸嗣君爲先生援請 封典

寄思齋藏稿

卷四

壽序

辛

龍章寵錫鄉里榮之蓋左氏所謂有山之材而照以天光者而厥配潘宜人以慈孝儉勤之德善襄內政今且竝周花甲玉峯雙竦兒孫羅立齊眉之慶遠勝光鴻豈非靜德厚重與山同體故得儲祉凝休而有康強逢吉之應其歡暢宜何如哉吾聞先生清癯強健美須髯宜豪於飲者而守身謹疾久不近酒夫大斗以祈黃耆春酒以介眉壽酒固與壽相引也況以堅凝之體臻耆宿之年醴泉涌溜於天台珠樹瓊芝益增榮茂豈以酒累哉親友盍滿挹山壘頌天保如山之句以爲先生壽

邑教諭王窰墟同年壽序

官之親民者守令其最與士親者學官也然守令勞而學官逸罕簿書之勞身閑而道尊可日與諸生往來以道德文章相切劘久之漸移默化士習淳而民風之厚亦因之故其職宜靜而不宜動自師道之不立也其官是職者至欲牢籠公事以爲名而濟其私微特體乖師儒且心勞日拙亦非澹泊寧靜頤壽延年之道也若我同年王窰墟先生真老成靜鎮足以式型多士矣乎先生以金谿名諸生早歲登賢書爲松雲蘭畦兩夫子所

寄思齋藏稿

卷四

壽序

至

器重顧屢困公車久乃得司鐸吾邑值某以服家居既闕謀北上親炙之日少然嘗一再瞻丰采聆其緒論藹然有道氣人也洎補官京師縣中人至所以述先生益詳蓋邑自土棚爭額以來元氣未復理宜休息養其和平凡學中以公事涉訟紛爭者先生時出正言規勸卒未嘗有所左右一切修城築隄諸好名目概不與聞請託之私尤所恥焉自月課歲科試外惟以經史爲事數召諸生入署從容文燕間以手談相娛意不在勝負間也夷考其行大抵得力於主靜用是宰重其品紳士亦

樂與之游茲值周甲辰相與謀製屏稱祝而走書屬余以序余惟靜者多壽故孔子以壽爲仁者靜之效先生以主靜之德居應靜之地其壽也固宜邑中近來才智輩出諸事求勝前人往往能動而不能靜而樂從先生往來知所以潛移默化者多矣抑漢詔云安靜之吏悃悃無華日計不足月計有餘知不獨學官宜靜也使長民者皆能安靜如先生思所以息事寧人不爲豪黠所誘惑風俗何患不厚使邑人司鐸它郡者皆安靜如先生又何患士俗不端而師道不立以一靜息羣紛而同登仁壽靜無量壽亦無量豈獨致一身之壽已乎先生德立而文優漸爲大吏所稔知學使者考察皆超等秩滿有日行且膺卓薦涖州縣爲親民官其拊循教誨必能如今日與士相親可知祇恐政務殷繁有求如今日身閑境逸而不可得者然勤以爲用靜以爲體吾還望先生以主靜之德居之也吾尤望邑之人逮先生未升時相與飲其和而薰其德也謹序

鮑母周孺人壽序

中論壽有三一曰王澤之壽蓋國家久道化成太平翔洽百姓飲和食德自宜永其天年顧王澤涵濡溥海如一壽之所應不一致焉惟得天之厚者乃能膺遐福而應昌期若夫年躋耄耋期頤親見五代七代抑又難也聖朝累洽重熙登民仁壽百齡之奏史不絕書今

上受寶初特詔天下壽民壽婦五世同堂及親見七代者分別給匾賜帛百年者賜金建坊以聞著爲合蓋推純皇帝五福五代堂記之意以錫福厥庶民甚盛典也

寄思齋藏稿

卷四 壽序

七

自嘉慶之元至今八年各省以壽民壽婦如例上請者累千百而未已王澤之壽斯爲盛矣顧嘗獨念吾萬載處江西上游山高而水清民風淳樸其向化尤易其被澤而壽也宜多卒未聞有人焉膺斯典者豈地僻遠有例而弗聞歟抑難於舉報歟蓋在京時數與同邑諸君歎及之洎余告養旋里而始知孺人適以五世同堂獲旌也夫孺人則可謂得天之厚能膺遐福而應昌期者矣抑余母胥太宜人壽躋八旬孫曾之盛與孺人相若自辛酉抱元孫三歲矣戚友僉謂應旌典請以聞母

以事涉自夸止之余兄弟初亦以爲然也旣思之此
朝廷盛典美意不可負且親有慶而弗彰亦非人子所
宜方謀所以呈報者而孺人已不啻前事之師則豈特
孺人之美已哉其子若孫揚親之休亦有足多者焉今
年春孺人令嗣某介余友恬齋囑余言爲壽余惟榮名
壽考相兼恒難夫里巷士庶名不達於公卿其壽也姻
友族黨慶譽之已耳至於巾幗雖賢不踰闔閭稱祝益
罕矣今孺人之壽也郡邑詳之督撫題之部臣奏之

天子俞之載在掌故勒之志乘匾額炳煥千載猶榮名
寄思齋藏稿

卷四 壽序

壽

孰彰焉以吾邑山川風俗之美其清淑淳厚釀爲蕃祉
老壽足以徵懿化而邀 寵錫者未艾也有孺人前事
爲之倡宜莫不歡欣鼓舞願以名氏達

天庭被榮光他日壽人之多天下且以吾邑爲華胥之
國然則其壽也豈特孺人一門之慶已乎余又聞孺人
年登大耋尙綜理家政神明不衰自茲以往百齡屆期
孫支益蕃衍大吏將題請建坊焉余請拭目以觀昇平
人瑞之書也謹序

漆母蕭孺人壽序

唐以前昏對必量門戶若崔盧李鄭王謝之屬皆衣冠舊族世爲姻媾其甥舅間旣多可稱述而其婦女亦多賢明福壽克佐其夫佑啟子孫輝映彤史蓋尹媿高門明詩爛禮淵源有自蘋藻之流澤非虛也吾郡邇來科第仕宦莫盛萍鄉最著者劉鄧蕭王文諸家旺氣所鍾宜閨闈亦多賢媛余旣先與王春堂聯姻於諸家不無仄葛而民部蕭公義卿尤余官京師時契友也已而大源頭朱子彬如從余游從容述其姻族因得聞其太外

寄思齋藏稿

卷四 壽序

蓋

舅漆公魯齋懿行而并及太外姑蕭孺人其福履之盛詳哉言之矣抑孺人系出自蕭爲萍望族與民部支派遠近未知何若要其爲詩禮名媛則可想而知蓋聲應氣求婚媾亦然朱陳之好各以類從昔晉樂廣之於衛玠唐苗夫人之於韋皋竝以擇壻標鑒見稱當時今彬如好學能文而溫雅恂實爲孺人孫壻卽相攸之善而魯齋翁與孺人之賢明可知也昔何無忌似舅劉牢之和嶠似舅夏侯元王筠似外祖袁粲蓋芝醴根源不必盡由祖父外家亦有力焉今彬如子榜馨年才十五

文筆清昶器宇英英不凡有魏舒成宅相意卽自出之
美而漆氏潤陽之澤與孺人燕貽之庥竝可知也朱與
漆在萍著族雖稍遜劉鄧諸家然歲科試以文字受知
學使者列學官弟子員不絕而孺人長嗣君巍然在錄
餘或入成均或就郡邑試竝有聲孫曾五世一堂皆森
如竹立有干霄望雖魯齋翁式穀使然亦壺助能賢慶
流奕葉之徵矣魯齋元配早世翁壽止古稀而孺人年
登大耋聰強不衰天所以胙孺人者遠矣哉適彬如書
來屬序其壽夫勤儉孝慈賢媛之通稱彬如雖不言吾
寄思齋藏稿

卷四 壽序

姜

固知其克盡也抑語云桂林無雜木今孺人康疆逢吉
其爲德足遠蔭豈獨於其子孫必且并其女孫及所自
出之彌甥而庇蔭之將來兩姓科名仕宦衣冠閭閻鼎
盛於時遠與古昔崔盧王謝匹休而近與劉鄧蕭王文
諸家爭烈胥於孺人基之矣漆氏諸郎勉乎哉彬如勉
乎哉榜馨勉乎哉請以是爲孺人侑爵且以訊之民部
蕭公以爲何如也

節孝袁母何孺人壽序

某少時則聞白良袁山泉先生家教之美而未及見其人也嘗因就童試獲見諸嗣君心傾慕之其季嗣蕙浦既與余爲僚壻重以新姻之結往來甚密因得遍識其子姪蓋玉樹芝蘭美不勝挹山泉公遺風概可想見而其姪孫洪慶闇然如上古尊彝幽光寶色歷久乃著余既以賢其人已而知其亦山泉公裔而得力母氏何孺人教居多也孺人爲太學生定榮公長女詩禮名門凡侍尊章睦妯娌髻時皆夙嫻其說年十八歸茂才咸一寄思齋藏稿

卷四 壽序

五

君蓋山泉公之次子出爲堂弟榮珍後者也當是時咸一在邑校中文名已久而山泉公督課嚴孺人復挑燈佐讀名愈噪已而疾卒孺人念孤未三齡須成立慰夫志乃茹痛支持以養以教稍長令就傳勤課業不少姑息其持家謹儉戒洪慶毋染華靡習洪慶祇承慈訓節浮用力學學以日進田園亦日增顧數奇屢阨於學使者乃援例貢成均今行年五十矣族之人暨邑紳士旣以孺人節行聞有司獲膺

恩賚建坊表其閭明春七十帨辰洪慶預謀所以稱觴

者以書來屬序而微以未慶弄璋遂孺人含飴之樂爲
歉也余應之曰人各有所以自傳者焉士之功德文章
婦女之貞烈苟可以銘金石垂史冊其爲馨香百世不
第如孫曾之承祧祀而已今孺人之節已勒於坊而載
於志矣人生鼎鼎百年貴且適意苟椒聊蕃衍而子婦
勃谿雖多何益昔北宮嬰兒以一女能孝養而其親怡
然忘老今賢孝如洪慶老萊之夫妻歡侍而又有婉婉
四孫女昕夕環侍色笑增舞綵之娛孺人顧而樂之其
神明愉暢必壽永期頤可知也且善人天所旆以孺人
寄思齋藏稿

卷四 壽序

癸

之德嗣子之賢固足以感天庥以山泉公家教忠厚其
流芳旁浹必且徧及其出繼之子孫而綿麻弗替焉更
可知也夫韞玉久者出愈珍松柏之陰常草不植鶴鷺
之翼仙轂偏遲昔李密生年四十有四而祖母劉九十
有六倘孺人七十而抱孫較之劉遲十七年耳未爲晚
也謹以是爲孺人壽

陳母繆太宜人壽序

父母之愛子孫而望其成立一也然母尤難於父所見不踰閭閻無博通今古之資供其訓迪卒能以德業成就其子若孫此必其才其識有迥異於尋常巾幗者卽其精神福澤亦必得天獨厚而綿慶於後昆若是者余於陳母繆太宜人見之太宜人者余庚戌同年蔭山之母也蔭山直綸閣日多官守各局相見恒稀洎余告養旋里蔭山先已從軍秦中旋以外艱歸奉養母不出山不相聞者十年比余重入京補官蔭山已不可復見矣

寄思齋藏稿

卷四 壽序

五

道光乙酉丙戌間蔭山之嗣餘仙春臺襄余校士三吳詢悉太宜人聰彊猶昔因并悉餘仙昆季學業皆太宜人所就太宜人江右名家幼嫻姆教諸懿行不勝述生平倦倦尤以助子孫成名爲急其延師庖饌必豐潔家事不以煩兒輩蔭山以是得壹志於學成進士官中翰其弟鳳山登賢書研香名諸生竝卓然有時望當蔭山設帳義學時餘仙昆季與其叔父畱家塾每夜課太宜人共燈紡績蔭山自館歸必閱問餘仙等課藝太宜人聞進境則喜不則舉親串中力學者愧勵之餘仙昆季

因是爭濯磨競爽爲副舉廩生人調陳母教澤已被子孫兩世云今年仲冬八十慶期舡仙將歸捧觴上壽而屬余致詞也余惟坤之用六曰利永貞釋者曰坤安貞純坤變乾則爲永貞蓋母道而兼父道太宜人有焉坤德無疆爲母爲衆爲文以太宜人德教多賢子孫而蕃祉老壽也固宜今孫曾繞膝研香旣侍養弗離舡仙昆季能讀父書得太母歡昔范喬之受研李百藥之錫名均爲太母鍾愛後俱以名臣光顯門閭太宜人福澤正未有艾也抑余聞定海素稱佛國婦女尤崇信釋氏獨寄思齋藏稿

卷四 壽序

李

太宜人家範嚴肅不入寺禮拜不茹素誦經是亦永貞之義然雖不奉佛而躬膺福壽已如此此足破巾幗習見且爲慈母壹意勗子孫成名者勸也然則太宜人可以勉進珍膳怡然加爵矣謹序

通飭山東士子文

士爲四民之首士習端則人心正而風俗厚夫農工商賈各出穀帛通財貨以養人竭力以供上而士獨無所事徒以讀書明理志聖賢之志行聖賢之行它日居公卿大夫可出所學以又安衆庶卽使窮而在下亦能以其道表率鄉里使薰德善良化成仁俗此士所以尊於四民而國家養士選士典所由隆也我

聖朝崇儒愛士厚澤深仁百數十年於茲凡身列黌序應無不續學敦行仰副

寄思齋藏稿

卷四 訓士文

空

聖王作人之化況山左爲孔孟桑梓之鄉先聖賢流風遺韻猶可想見第恐日久漸失專尙文辭爲獵取科名之具而實行不修以致士風日漓夫士先器識而後文藝科目所以憑文取士者非取其能文謂卽文以覘所養其人必於道有得必所行無愧聖賢進可備國家任使退可以矜式鄉閭也使孝友有虧廉讓無聞口談仁義行同販豎醜然儒冠儒服已爲可羞甚至多事健訟挾制官長包漕開漕希圖網利甘爲一切苟賤之行卒致名遭斥革身陷刑辟悔之何及縱使法網倖逃已爲

人所不齒恥孰甚焉且名號爲士而素行不足取重於人蚩蚩鄉氓目不見孝弟之行耳不聞忠信之言不知禮義廉恥爲何物其暴橫無賴者更何所敬憚又何怪異端邪說得以餌誘煽惑之也夫所貴儒者非但成已必將有以成物然必先正而後可正人也今士風若此尙望鄉里薰其德而善良乎卽或倖邀科第出而居官亦必妨政害民爲朝廷羞原所以致此者皆視讀書作文爲科第計所謂弄筆墨以邀利而不務實行也夫邀利而不務實行其人必苟且無恥於是鑽營懷挾寄思齋藏稿

卷四 訓士文

奎

傳遞鎗旨詭獎百出并所謂科目文章而亦出於僞士行若此尙可言乎今欲痛懲此病惟以立志學聖賢爲先聖賢之道備於四書五經而括於

聖諭廣訓亦求盡乎子臣弟友無愧爲人而已孟子曰人之所以異於禽獸者幾希善利之間舜蹶分焉人禽判焉學聖賢則爲人從此而盡倫盡道可以踐形而至於聖卽不能爲聖亦不至獲罪名教也苟不學爲聖賢則入於非人而已矣尙可言士乎吾甚望爾諸生顧名思義立志自重無負

國家教養之恩有能績學厲行孝友睦婣任卹著聞鄉里者各學官具列優行詳報其有倫理乖忤行止不端及一切好訟滋事亦詳具劣蹟使者核實加賞罰焉懍旃無忽

寄思齋藏稿

卷四 訓士文

奎

通飭山東武生文

國家建立學校文生員外復置武生別於卒伍之流而號爲秀才蓋以文藝雖非所優而質尙秀良且弓馬技藝足備折衝禦侮之用使其優游庠序親近師儒日聞詩書之訓觀禮讓之節以柔其血氣養其材德雖文武所取各殊陶冶裁成之心則一也故三載賓興與文科竝重而將帥之才亦往往出其中山左夙稱秉禮之邦雖重鑲兩牡齊俗以武勇相矜而矯矯虎臣小大從公魯頌之遺風可想況沐浴

聖朝雅化深仁厚澤凡屬庠衿應無不深知忠孝大節
敦廉讓明禮義者乃聞該省近來特符滋事包漕鬧漕
之案多出自武生甚至有聽從邪教助爲叛逆者殊堪
痛恨夫邪教假託邀福仙佛往生西天之說騙錢供養
以漸售其奸邪在愚民無知或被其煽惑不意庠衿而
亦惑之夫人所以異於禽獸者以有人倫也人倫莫大
於君父今其教曰無生父母竟忘其身所自生而欲無
之是無父也無父卽無君叛逆自此而起夫羊知跪乳
烏能反哺下至蜂蟻亦有君臣今邪教乃禽獸蜂蟻之

寄思齋藏稿

卷四 訓士文

畜

不若凡稍知禮義者皆深惡痛絕之在文庠斷不爲所
惑何武生竟甘入其黨乎此由平日不親近正人不聞
聖賢之訓貪利昧義私欲橫流浸至忘親犯上入於非
人而不自知也夫所謂聖賢之教者何也父子有親君
臣有義夫婦有別長幼有序朋友有信此天地生人自
具之倫理三皇五帝以來修道之教不外乎此其爲教
易從其爲道甚大誠遵而行之精而察之可以寡過可
以入聖可以仰邀天祐孝友睦婣任卹之風於此成忠
君衛國克敵致果將帥之才於此具又焉有好訟滋事

者利亡恥與一切誠行邪說犯上作亂之爲乎且爾等
身列膠庠旣爲四民之秀方將扶植綱常秉正道以教
化鄉里見有邪說誣民者卽當奮其禦侮之才力攻其
失爲吾道干城以扞衛里黨奈何身先爲不端乎昔晉
周處聞父老之言斬蛟射虎折節改行立除三害卒登
顯位以忠義聞於天下見稱史冊夫聖狂之分爭於一
念遷善改過取象風雷吾甚願爾諸生顧名思義以聖
門弟子自重求盡乎子臣弟友之道處爲良士出爲良
將庶無負

寄思齋藏稿

卷四 訓士文

室

朝廷教養之恩有能砥節厲行和睦宗族周卹鄰里表
率鄉黨者學官具以優報將照例加獎達部其倫紀有
虧行止不端與一切好訟滋事者詳具劣蹟使者核實
定行斥革各懷毋忽

